

Aushi: Bible for Luka

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Luka

1

¹Abengi balibulile umulimo wakubika pamo ifintu ifya fikilishiwa pali fwebo, ²mu musango umo wine fyapelelwemo kuli fwebo ukufuma ku bakubalilapo abo abali bakambone bacine kabili ababomfi ba cebo. ³Eco calimoneke icabune nakuli nebo wine, pantu nalifwailikishe fyonse bwino ukufuma mukutendeka, ukwebati nkulembele ifya kusuntinkana bwino, we wakucindikwa Teofile, ⁴pakwebati wishibe cine pa fintu ifyo wa sambilishiwa. ⁵Mu nshiku sha mfumu Herodi imfumu yaku yudea kwaliko shimapepo ishina lyakwe ni Sekaria ukufuma mu cakaniko cakwa Abiya; umukashi wakwe Elisabeti nao ali wa muluko lwakwa Aaroni. ⁶Bonse babili bali balungami kuli Lesa, bali kwenda ababula akabi mu mafunde yonse ne fipope fyakwa Shikulu. ⁷Lelo tabakwetepo mwana pantu Elisabeti ali ni ng'umba, kabili bonse babili inshinku shabo shali - tantalile. ⁸Nomba calishile kuba ukwebati Sekaria ali muceni cakwa Lesa, akobomba imilimo ya bushimapepo ukunkoka icakaniko cakwe. ⁹Ukulingana no mwata wakusalilamo nga ni shimapepo nshi akopyunga, alisalilwe mukupendula ukwingila mwi tempele lyakwa Shikulu mukoca ifya cena ca bune. ¹⁰Lyonse ibumba lya bantu lyali kupepela panse pa nsa ulo ifya cena cabune fyali kocewa. ¹¹Nomba malaika wakwa Shikulu alimonekele kuli ena no kwiminina lubali ku kulyo kwa cipailo ca fya cena cabune. ¹²Ulo Sekaria amumwene, alicushiwe, kabili alyumfwile umwenso. ¹³Lelo malaika alimwebele ati, "Witina, Sekaria, pantu ipepo lyobe lilyumfwikile. Umukashi obe Elisabeti akakufyalila umwana mwaume. Ukamwinika ishina lyakwe Yohane. ¹⁴Ukakwata ukusekelela ne nsansa, kabili abengi bakasangalala pa kufyalwa kwakwe. ¹⁵Pantu akaba mukalamba ku cinso cakwa Shikulu. Tafwile ukunwa umwangashi nangu ukunwa conse icikola, kabili akesulamo no Mupashi wa Mushilo ukufuma mu nda muli nyina. ¹⁶Abengi aba mubufyashi bwakwa Israeli bakapilibukila kuli Shikulu Lesa wabo. ¹⁷Akaya pa cinso cakwa Shikulu mu mupashi na maka yakwa Eliya, no kupilibula imitima ya bashibo ku bana na batabela ku mucetekenya wa bakulungama - ukuteyanishisha Shikulu abantu abaipekanya pali ena" ¹⁸Sekaria alyebele malaika ati, "Bushe nkeshiba shani ifi? Pantu ndi mukote kabili umukashi wandi nao alitantalile mu nshiku shakwe." ¹⁹Malaika alyaswike no kumwebati, "Nine Gabriele, uwiminina muceni cakwa Lesa. Nalituminwe ukulanda kuli webo ukukuletela iyi mbila nsuma. ²⁰Mona! Ukaba tondolo, Tawakale kulanda, mpaka ubushiku ifi fintu fikacitika. Neci nipa mulandu wakwebati tausumine amashiwi yandi, ayo ayakafikilishiwa pa nshita lyayana. ²¹Nomba abantu balikulolela Sekaria. Calibapapwishe pantu aliposele inshita sana mwi tempele. ²²Lelo ulo afumine panse, talandile nabo. Bali kutulwike ukwebati alimwene icimonwa ulo aciba mwi tempele. Alikubacebushafye no kubelelela tondolo. ²³Caishile kuba ukwebati ulo inshiku shakupyunga kwakwe shapwile, alile ku ng'anda yakwe. ²⁴Panuma ya ishi nshiku, umukashi wakwe Elisabeti alimite na pa myeshi isano alikuifisa umwine. Alyebele ati, ²⁵"Ifi efyo Shikulu ancitile ulo andoleshe no bubile pakwebati afumye umusebanya wandi ku bantu." ²⁶Mu mweshi wakulenga mutanda, Malaika Gabriele balimutumine ukufuma kuli Lesa ukuya mu musumba wa mu Galili uwitwa Nasareti, ²⁷kuli nacingu uwa kobekelwe ku mwaume uwe shina lya Yosefe, uwa mu lupwa lwakwa Dabidi, kabili ishina lyakwa nacingu ali ni Maria. ²⁸Alishile kuli ena no kulanda ati, "Mwapoleni, webo we wakusenaminwa apakalamba! Shikulu ali nobe." ²⁹Lelo alisakamikwe pa mashiwi yakwe kabili alilangulwike nga kuposha kwa musango nshani uku kwingaba. ³⁰Malaika alimwebele ati, "Witina, Maria, pantu webo ulisangile ububile kuli Lesa. ³¹Mona, ukemita mwi fumo lyobe no ku fyala umwana umwaume. Uka mwinika inshina lyakwe 'Yesu.' ³²Akaba umukalamba kabili akale kwitwa Umwana wa Wapulamo. Shikulu Lesa akamupa icipuna ca bufumu bwa cikolwe cakwe Dabidi. ³³Akateka pa ng'anda ya kwa Yakobo umuyayaya, kabili takwakabe impela ku bufumu bwakwe." ³⁴Maria alilandile kuli malaika ati, "Ni mu musango ndo ifi fikacitika, pantu ntaishiba mwaume?" ³⁵Malaika alyaswike no kumweba ati, "Umupashi wa mushilo ukaba pali webo na maka ya Wapulamo yakakufimba. Eco uwa-mushilo ukafyalwa aketwa Umwana wakwa Lesa. ³⁶Mona, lupwa obe Elisabeti nao alimite umwana umwaume mu bukote bwakwe. Uno emweshi wakulenga mutanda kuli ena, uyo uwalikwitwa ing'umba. ³⁷Pantu takwakabe icakosa kuli Lesa." ³⁸Maria alilandile ati, "Mona, ndi kanakashi umubomfi wakwa Shikulu. Nacibe kuli nebo ukulingana ne mbila yobe." Nolu malaika alimushile. ³⁹Nolu Maria aliimine muli shilya nshiku kabili mukwangufyanya alile ku calo ca mpili, ku musumba wa Yudea. ⁴⁰Alingile mu ng'anda yakwa Sakaria no kuposha Elisabeti. ⁴¹Nomba calicitike ukwebati ulo Elisabeti aumfwilefye ukuposha kwakwa Maria, umwana munda yakwe alitolweke, kabili Elisabeti alisushiwemo na Mupashi wa Mushilo. ⁴²Alililile ne shiwi lyakupundisha no kulanda ati, "Walipalwa webo pa banakashi, kabili bwalipalwa ubufyashi bwa mwifumo lyobe. ⁴³Nindo cacitikila kuli nebo ukwebati nyina wa kwa Shikulu wandi ese kuli nebo? ⁴⁴Eco mona, ulo iciunda cakuposha kobe cishile ku matwi yandi, umwana mwi fumo lyandi acitoloka ku nsansa. ⁴⁵Alipalwa umwanakashi uwasumina ukwebati kukaba ukufikilisha kwa ifi fintu ifyo aebelwe ukufuma kuli Shikulu." ⁴⁶Maria alilandile ati, "Umweo wandi ulelumbanya Shikulu, ⁴⁷kabili umupashi wandi ulyangile muli Lesa umupusushi wandi. ⁴⁸Pantu alilolekeshe pa kuicefye kwakwa kanakashi umubomfi wakwe. Pantu mona, ukufuma nomba ne nkulo shonse shakulankuta uwakupalwa. ⁴⁹Pantu uwa Maka yonse alincitile ifintu ifikulu, kabili ishina lyakwe lya mushilo. ⁵⁰Ulose lwakwe lwalibelelela ukufuma ku nkulo ukufika ku nkulo kuli abo abamutina. ⁵¹Alilanga ubukose ku kuboko kwakwe; alisalanganya abo abaisansabike mu matontonkanyo ya mitima yabo. ⁵²Alitentemuna abalupaka ukufuma pafipuna fya bufumu bwabo kabili no kusumbula abaicefya mu mibele yabo. ⁵³Alikwishe aba nsala ne fintu fyabune, lelo alilekelele aba fyuma ukuya iminwe - nkutwa. ⁵⁴Alipele icafwilisho kuli Israeli umubomfi wakwe, pa kwibukisha ukulanga uluse ⁵⁵(nga fintu alandile kuli ba shifwe) kuli Abrahamu na bamubufyashi bwakwe umuyayaya." ⁵⁶Maria alikele na Elisabeti ukufika ku myeshi itatu kabili alibwelele ku ng'anda yakwe. ⁵⁷Nomba

inshita yalifikile kuli Elisabeti iya kupapa umwana kabili alifyele umwana umwaume.⁵⁸ Abena mupalamano na balupwa bakwe balyumfwile ukwebati Shikulu alilangile uluse lwakwe ulukalamba kuli ena, kabili balisangalele nankwe.⁵⁹ Nomba calicitike pa bushiku bwakulenga cinekonsekonse ukwebati baliletele umwana mu kusembululwa. Nga balimwinike "Sekaria," ishina lyakwa wishi.⁶⁰ Lelo nyina alyaswike no kwebati, "Iyo. Ali no kwitwa Yohane."⁶¹ Balilandile kuli ena ati, "Tapaba nangu umu uwitwa ili shina mu balupwa lobe."⁶² Balilangile wishi ifyo alikufwaya umwana enikwe.⁶³ Wishi alilombe icipapatu apakulemba kabili alilembele, "Ishina lyakwe ni Yohane." Caliba papwishe bonse pali ici.⁶⁴ Apopenefye akanwa kakwe kaliswike kabili ululimi lwakwe lwalikakwilwe. Alilandile no kulumbanya Lesa.⁶⁵ Umwenso walikete bonse abena mupalamano ba bashingulwike. Ne milandu yonse iyi yalisalanganine mufyalo fya mu mpili ifya mu Yudea.⁶⁶ Bonse aba bomfwile ba balibasungile mu mitima yabo, ukweba ati, 'Kanshi uyu mwana akaba shani?' Pantu ukuboko kwakwa Shikulu kwali nao.⁶⁷ Wishi Sakaria alisushiwemo na Mupashi wa Mushilo kabili aliseseme, ukweba ati, ⁶⁸"Alumbanishiwe Shikulu, Lesa wa kwa Israeli, pantu alishile mukwafwilisha kabili alipwilishishe icilubula ca bantu bakwe.⁶⁹ Alimishe ulusengo lwe pusukilo pali fwebo mu ng'anda ya mubomfi wakwe Dabidi ⁷⁰(nga filya alandile ku kanwa ka bakasesema ba mushilo ukufuma ku kale), ⁷¹ukulubuka ukufuma ku balwani besu kabili ukufuma kumaboko ya abo abatupata.⁷² Ali nokucita ici ku kulanga uluse kuli bashifwe no kwibukisha icipangano cakwe ica mushilo, ⁷³umulapo uo alapile kuli Abrahamu shifwe. ⁷⁴Alilapile ukutupela pantu fwebo, alitupokolwele ukufuma ku maboko yaba lwani besu, tukamupungila ukwabula mwenso ⁷⁵muli bumushilo kabili mu bulungami ku cinso cakwe inshiku shesu shonse.⁷⁶ Ee, kabili webo, we mwana, ukakutwa Kasesema Uwapulamo, pantu ukaya ku ntanshi yakwa Shikulu ku kukupekanya inshila shakwe, ku kupekanya abantu palwa kwisa kwakwe, ⁷⁷ukupela ubwishibilo bwe pusukilo ku bantu bakwe ukupitila mu kwelela kwa membu shabo.⁷⁸ Iki fikacitika pa mulandu wa luse lwakwa Lesa wesu, pamulandu wa ici ulubuto lwa kutula kwa kasuba ukufuma mu mulu lukesa kutwafwa, ⁷⁹kukusanika pali abo abekala mu mfinshi na mu cinshingwa camfwa. Akacita iki ku kutungulula amakasa yesu mu nshila ya mutende."⁸⁰ Nomba umwana alikulile kabili alikosele ku mupashi, kabili ali mu matololo ukufika na ku bushiku bwa ku moneka kwakwe palwalala kuli Israeli.

2

¹Nomba muli shilya nshiku, calishile kuba ukwebati Kaisere Augusti alitumine icipope ukwebati ukupenda kucitwe ukwabantu bonse abekala mu calo. ²Uku ekwali ukupendwa kwakubalilapo ukwacitilwe ulu Qwirini ali kateka wa ku Syria. ³Eco cila umu alile ku Musumba wakwe ku kulembeshiwa kukupendwa.⁴ Yosefe nao alile ukufuma ku Galili, ukufuma ku musumba wa Nasareti, ku Yudea, ku musumba wakwa Dabidi, ukutwa Betelehemu, pantu ali wa mu ng'anda kabili mulupwa lwakwa Dabidi. ⁵Alile kulya ku kulembesha pamo na Maria, uo akobekela kuli ena kabili ali ne fumo.⁶ Nomba calishile kuba ukwebati ulu bacili bali kulya, inshinta ya kupapa umwana wakwe yalifikile. ⁷Alifyele umwana umwaume, umwana wakwe ibeli, kabili alimupombe mu nsalu ishitali isha mishilwa yakulola mu butali no kumulalika mwitanga, pantu tamwali umuputule wabo mu ng'anda ya beni.⁸ Kwali bakacema kuli cilya citungu abalikwikala mu mpanga, bakolinda imikuni shabo ubushiku. ⁹Malaika wakwa Shikulu alimonekele kuli bena, no bukata bwakwa Lesa bwalisanike ukubashinguluka, kabili baliketwe no mwenso uukalamba.¹⁰ Nolu malaika alilandile kuli bena ati, "Mwiba na mwenso, pantu ndimiletele imbila nsuma iyo iikaleta insansa inshikalamba ku bantu bonse. ¹¹Lelo Kapususha alimifyalilwe mu musumba wakwa Dabidi! Ni Kristu Shikulu! ¹²Ici ecishibilo icikapelwa kuli mwebo: Mukosanga akanya kalifungilwe mu nsalu kabili kalilele na mwitanga."¹³ Mukupumikishafye pamo na malaika kwali bumba ilikalamba ukufuma kumulu, likolumbanya Lesa no kwebati, ¹⁴"Ubukata kuli Lesa uwa mwasansama, kabili napabe umutende pesonde pakati ka bantu abo abekelwamo."¹⁵ Calishile kuba ukwebati ulu malaika aile ukufuma kuli bena ukuya mu mulu, bakacema balilandile kuli cila umu na umu, "Natulekuya ku Betelehemu no kumona ici cintu icicitikile, ico Shikulu elengele cishibikwe kuli fwebo." ¹⁶Balyangufwenye ukuya kulya kabili balisangile Maria, Yosefe, na kanya, akalele mwitanga.¹⁷ Panuma ya kumumona, balilondolwele icalandilwe kuli bena palwa uyu mwana. ¹⁸Bonse abaumfwile balisungwike pa fyalandikwe kuli bena ukufuma kuli bakacema. ¹⁹Lelo Maria akonkenyepo ukutontonkanya pa fintu fyonse ifyo aumfwile, ukufisunga mu mutima wakwe. ²⁰Bakacema balibwelelele, bakopela ubukata no kulumbanya Lesa pali fyonse ifyo baumfwile no kumona, kubati fintu fyalandilwe kuli bena.²¹ Ulu ubushiku bwakulenga cinekonsekonse bwapwile, ulu asembulwilwe, alinikwe Yesu, ishina ilyo apelwe ukupitila muli malaika ilyo talaimitwa mwifumo.²² Ulu nshiku shalinga isha kusangululwa kwabo shapitile, ukulingana na malango yakwa Mose, balimuletele kwi tempele mu Yerusalemu ku kwisa kumutula kuli Shikulu. ²³Nga fintu calembwa mu malango yakwa Shikulu, "Umwaume onse uwakubalilapo mwi fumo akapelwa kuli Shikulu." ²⁴Eco balipele ilambo ukulingana ne fyalandilwe mu malango yakwa Shikulu, "inkunda shibili nangu ifipele ifyana fibili."²⁵ Moneni, kwali umwaume mu Yerusalemu ishina lyakwe ni Simeon, kabili uyu muntu ali mulungami kabili uwaipesha. Alikulolela icikoseleshi cakwa Israeli, kabili Mupashi wa Mushilo ali pali ena. ²⁶Calisokolwelwe kuli ena na Mupashi wa Mushilo ukwebati takamone mfwa ulu talati kumona Kristu wakwa Shikulu.²⁷ Alitungululwilwe na Mupashi, Simeone alishile mwi tempele. Ulu abafyashi baletete umwana Yesu mukati, ukumucitila ukulingana no mwata wa malango, ²⁸alimwimishe mu maboko yakwe no kulumbanya Lesa, kabili alilandile ati, ²⁹"Nomba lekeni umubomfi wenu alekuya mu mutende, mwe Shikulu, ukulingana ne cebo cenu."³⁰ Pantu amenso yandi yalimwene ipusukilo lyenu, ³¹ilyo mwapekanya ku cinso ca bantu bonse: ³²Ulubuto lwa busokololo ku bena fyalo no bukata kubantu bobe abena Isreali."³³ Wishi na nyina balipapwike pa fyalandilwe pali ena. ³⁴Simeone alibapalile kabili alilandile kuli Maria nyina ati, "Mona, uyu mwana alisontwa kukuwa no kwimishiwa kwa bantu abengi mu Isreali kabili icishibilo icanwa- ³⁵kabili ulupanga lukalasa umweo obe - pakweba ati amatontonkanyo ya mitima

iingi yengasokololwa.³⁶ Kasesema umwanakashi uwalikwitwa Ana emo ali. Ali mwana mwanakashi wakwa Fanuele ukufuma ku mutundu wakwa Ashere. Alitantalilako mu nshiku shakwe. Alikele no mulume wakwe imyaka cinelubali panuma ya buna cisungu bwakwe,³⁷ kabili ali ni mukamfwilwa pa myaka amakumi cinekonsekonse na ine. Tatalile afuma mwi tempele lelo alikupyunga na mafungo na mapepo, ubushiku na kasuba.³⁸ Pali ilya inefye nsa alipalamine kuli bena no kutendeka ukupela matotelo kuli Lesa, kabili alilandile pa mwana kuli onse uwalikulolela ukulubulwa kwa Yerusalemu.³⁹ Ulo bapwishishe fyonse ifyo balikufwaikwa ukucita ukukonka na malango yakwa Shikulu, balibwelele ku Galili, ku mushi wabo uwa Nasareti.⁴⁰ Umwana alikulile kabili alikosele; alikwatishe amano, no kusenaminwa kwakwa Lesa kwali pali ena.⁴¹ Abafyashi bakwe balikuya cila mwaka ku Yerusalemu ku mutebeto wa cakucilila.⁴² Ulo ali ne myanka ikumi limo na ibili, nakabili balile pa nshinta ya mwata ku mutebeto.⁴³ Panuma ya kwikala inshiku ishakumanina ku mutebeto, balitendeki ukubwelela ku ng'anda. Lelo umulumendo Yesu alishele ku Yerusalemu na bafyashi bakwe tabaishibile ici.⁴⁴ Balitontonkenye ukwebati ali pe bumba ilyali kuya nabo, eco balyendele ubulendo bwa bushiku bumo. Nolu balitampile ukumufwailisha muli balupwa babo ne fibusa.⁴⁵ Ulo tabamusangile, balibwelelemo ku Yerusalemu no kutendeka ukumufwaya mukutekanya kulya.⁴⁶ Calishile kuba ukwebati panuma ya nshiku shitatu balimusangile mwi tempele, alikele pakati ka bakasambilisha, akoumfwa kuli bena akobepusha ne fipusho.⁴⁷ Bonse abamumfwile balisungwike pa bwishibilo bwakwe na masuko yakwe.⁴⁸ Ulo ba mumwene, balisungwike. Nyina alilandile kuli ena ati, "We mwana, nindo wacitila ifi kuli fwebo muli uyu musango? Lolesha, bawiso na nebo twacilakufwaisha."⁴⁹ Alilandile kuli bena ati, "Nindo mwaciba mukomfwaila? Tamwacishiba ukwebati naciba ku makwebo yakwa Tata?"⁵⁰ Lelo tabailwike umu aloseshe pali ayo mashiwi.⁵¹ Nolu alibwekelemo nabo ku ng'anda ku Nasareti kabili ali ne cumfwila kuli bena. Nyina alisungile ifi fintu fyonse mu mutima wakwe.⁵² Lelo Yesu alikonkonyepo ukukula mu mano na mu mushinku, kabili alikulile mu bubile kuli Lesa na ku bantu.

3

¹Mu mwaka wakulenga ikumi limo na isano mu buteko bwa kwa Tiberi Kaisare - ulo Ponti Pilato ali mulashi waku Yudea, Herodi ali ni mfumu yaku Galili, na Filipi munyina ali ni mfumu ya kucitungu ca Iturea na Tarakonitisi, kabili Lisanyasi ali ni mfumu yaku Abilene,² munshita Anasi na Kayafa bali bashimapepo bakalamba - icebo ca kwa Lesa calishile kuli Yohane umwana mwaume wakwa Sekaria mu matololo.³ Alile mu citungu conse icashingulwike Yordani, akoshimikila ulubatisho lwa kulapila ku kwelelwa kwa membu.⁴ Ngafilya calembwa mu citabo ca mashiwi ya kwa Esaya kasesema ukwebati, "Ishiwi lya umu ukobilikisha mu matololo, 'pekanyeni inshila yakwa Shikulu, tambalikeninshila shakwe."⁵ Umukonko uuli onse ukesushiwa, kabili ulupili lonse no tumilundu tukapaswa ne misebo yakolobana ikatambululwa, ne ncende sha kulundumama shikapangwamo imisebo,⁶ ne ca mweo conse cikamona ipusukilo lya kwa Lesa."⁷ Eco Yohane alilandile ku mabumba ayalikwisa mu kubatishiwa kuli ena ati, "Mwebo mwe bufyashi bwa mafwafwa! Bushe ninani wamisokele ukubutuka ukufuma ku bukali ubukoisa?"⁸ Eco, twaleni fisabo ifilingile ukulapila, kabili mwitendeka ukulanda muli mwebene ati, "Twalikwata Abrahamu nga shifwe," pantu nkomyeba nati Lesa kuti aimishapo Abrahamu abana ukufuma kuli aya mabwe.⁹ Na nomba line isembe lilibikilwe ku mishila ya miti. Eco kanshi icimuti conse ici shitwala ifisabo fisuma cikoputulwa no kuposwa mu mulilo.¹⁰ Nolu amabumba yalitwalile uku mwipusha, ukwebati, "Nindo kanshi fwebo tukofwaikwa ukucita?"¹¹ Alibaswikile no kulanda kuli bena ati, "Umfwa umu alikwete amalaya yabili, akanyeko umu uutakwetepo, no ukwete ifyakuya nao acite cimo cine."¹² Bakasonkesha nabo bene balishile mu kubatishiwa, nabo balilandile kuli ena ati, "Kasambilisha, bushe nindo tukofwaikwa ukucita?"¹³ Ali bebele ati, "Mwilekusonkesha ulupiya ulwingi ukucila palo ba myeba ukupoka."¹⁴ Abashilika nabo bali mwipushe, ukwebati, "Bushe nga fwebo? Nindo fwebo tukofwaikwa ukucita?" Alibelele ati, "Mwilekupoka lupiya ku muntu nangu umu ku maka, kabili mwilakushinina uuli onse ifyabufi. Mutemumwe na malipilo yenu."¹⁵ Nomba ulo abantu bali bakokabila sana Krisitu ukwisa, bonsefye balikulanguluka mu mitima yabo palwa kwa Yohane, nga kuti aba ni Kristu.¹⁶ Yohane alibasukile no kulanda kuli bonse ukwebati, "Nebo nkomubatisha na menshi, lelo umu uukoisa wa maka yakucila nebo, kabili nshalinga ukukakula intambo sha pa ndyato shakwe. Akamibatisha no Mupashi wa Mushilo no mulilo.¹⁷ Ica kupetwilako cili mu minwe yakwe ku kulula bwino fyonse pa cipulilo no kulonganya ingano kubutala bwakwe. Lelo akoca imisungu mu mulilo uushingashima."¹⁸ Na pa mashiwi yakukoselesha nayo ayengi, Yohane alikubilisha imbila nsuma ku bantu.¹⁹ Ulo Herodi imfumu ba ikalipile pa kupa umukashi wa kwa Herodia munyina, kabili ne fintu fya bubi fyonse ifyo Herodi acitile,²⁰ alilundilepo nefi kuli bonse, ifyakwebati aliisalile Yohane mu cifungo.²¹ Nomba caishile kuba ukwebati, ulo abantu bonse babatishiwe, Yesu nao alibatishiwe, kabili ulo ali akopepa, imyulu yaliswike,²² no Mupashi wa Mushilo walikile pali ena kubati lukunda, ne shiwi lyalifumine ku mulu likoeba ati, "Uli mwana wandi uwatemwikwa. Muli weba emo mbekelwa."²³ Ulo Yesu atendeke ubupyungishi bwakwe, ali ne myaka amakumi yatatu. Ali mwana mwaume (nga fintu calikutunganishiwa) uwakwa Yosefe, mwana mwaume wakwa Heli,²⁴ Mwana mwaume wakwa Matati, mwana mwaume wakwa Lebi, mwana mwaume wakwa Melki, mwana mwaume wakwa Yanai, mwana mwaume wakwa Yosefe.²⁵ Yosefe ali ni mwana mwaume wakwa Matatia, umwana mwaume wakwa Amose, umwana mwaume wakwa Nahumu, umwana mwaume wakwa Esli, umwana mwaume wakwa Nagai,²⁶ umwana mwaume wakwa Mati, umwana mwaume wakwa Matatiasi, umwana mwaume wakwa Semeini, umwana mwaume wakwa Yoseke, umwana mwaume wakwa Yoda.²⁷ Yoda ali mwana mwaume wakwa Yoanani, umwana mwaume wakwa Resa, umwana mwaume wakwa Serubabele, umwana mwaume wakwa Salatila, umwana mwaume wakwa Neri,²⁸ Umwana mwaume wakwa Melki, umwana mwaume wakwa Addi, umwana mwaume wakwa Kosamu, umwana mwaume wakwa Elimadamu, umwana mwaume

wakwa Er,²⁹ umwana mwaume wakwa Yoshua, umwana mwaume wakwa Eliesere, umwana umwaume wakwa Yorimu, umwana mwaume wakwa Matati, mwana mwaume wakwa Lebi.³⁰ Lebi ali mwana mwaume wakwa Simeone, umwana mwaume wakwa Yuda, umwana mwaume wakwa Yosefe, umwana mwaume wakwa Yonamu, umwana mwaume wakwa Eliakimu,³¹ umwana mwaume wakwa Melea, umwana mwaume wakwa Mena, umwana mwaume wakwa Matata, umwana mwaume wakwa Natani, umwana mwaume wakwa Dabidi,³² umwana mwaume wakwa Yese, umwana mwaume wakwa Obede, umwana mwaume wakwa Boasi, umwana mwaume wakwa Salmone, umwana mwaume wakwa Nashone.³³ Nashone ali mwana mwaume wakwa Aminadabu, umwana mwaume wakwa Adimini, umwana mwaume wakwa Arni, umwana mwaume wakwa Hesrone, umwana mwaume wakwa Perese, umwana mwaume wakwa Yuda,³⁴ umwana mwaume wakwa Yakobo, umwana mwaume wakwa Isaki, umwana mwaume wakwa Abrahamu, umwana mwaume wakwa Terah, umwana mwaume wakwa Nahor,³⁵ umwana mwaume wakwa Serugi, umwana mwaume wakwa Reu, umwana mwaume wakwa Pelegi, umwana mwaume wakwa Ebere, umwana mwaume wakwa Shela.³⁶ Shela ali mwana mwaume wakwa Kainani, umwana mwaume wakwa Afakisadi, umwana mwaume wakwa Shemu, umwana mwaume wakwa Noa, umwana mwaume wakwa Lameki,³⁷ umwana mwaume wakwa Metusela, umwana mwaume wakwa Enoke, umwana mwaume wakwa Yaredi, umwana mwaume wakwa Mahalaleli, umwana mwaume wakwa Kenani,³⁸ umwana mwaume wakwa Enosi, umwana mwaume wakwa Seti, umwana wakwa Adamu, umwana mwaume wakwa Lesa.

4

¹Nolu Yesu, pakuba uwaisulamo no Mupashi wa Mushilo, alibwelele ukufuma ku mu mana wa Yordani kabili alitungulwilwe no Mupashi mu matololo, ²pa nshiku amakumi yane alikutukwa na kasebanya. Talikulyapo nelyo kamo pali isho nshiku, na pa kupwa kwa ilya nshita alyumfwile nsala.³Kasebanya alilandile kuli ena ati, "Nga uli Mwana wakwa Lesa, "Eba ili libwe lyaluke umukate." ⁴Yesu alimwasuke ati, "Calilembwa aciti, 'Umuntu tekalila ku mukate wekafye.'" ⁵Nolu kasebanya alitungulwile Yesu pamulu no kumulanga amabufumu yonse aya pa calo mu kashita akanono. ⁶Kasebanya alilandile kuli ena ati, "Ndekupela insambu ishi shonse no bukata bwayako bonse, pantu fyalipelwa kuli nebo, kabili kuti napela ku kuuli onse uo nkofwaya. ⁷Eco kanshi, umfwa wamfukamina no kunshinshimuna, fikoba fyobe." ⁸Lelo Yesu alimwasukile no kulanda kuli ena ati, "Calilembwa aciti, 'Ulekushinshina Shikulu Lesa obe, no kumupyungila eka fye. ⁹Nolu kasebanya alitungulwile Yesu ku Yerusalemu no kumubika pa nsoshi ye tempele, no kulanda kuli ena ati, "Nga uli Mwana wakwa Lesa, ipose panshi ukufuma pano. ¹⁰Pantu calilembwa aciti, 'Akakomeshesha ba malaika bakwe palwa webo, uku kucingilila,' ¹¹kabili, 'Bakakusumbula mu maboko yabo, pakwebati tauipunwine ulukasa lobe kwilibwe.'" ¹²Pakumwasuka, Yesu alilandile ati, "Calilandwa ati, 'Wilakweshesha Shikulu Lesa obe.'" ¹³Ulo kasebanya apwile ukutunka Yesu, alifuminepo kabili alimushile mpaka inshita imbi. ¹⁴Nolu Yesu alibwelele ku Galili mu maka ya Mupashi, ne lyashi pali ena lyali salangene ukushinguluka icitungu conse. ¹⁵Nolu alitendekele ukusambilisha muma sunagoge yabo kabili ali lumbanishiwe kuli bonse. ¹⁶Alishile ku Nasareti, uko akulile, kabili, nge fyali ulutambi lwakwe, aliingile mu sunagoge pa bushiku bwe Sabata kabili alimine ku kubelenga mukubilikisha. ¹⁷Umufungilo walembelwepo ifya kwa kasesema Esaya walipelwe kuli ena. Aliswile umufungilo kabili alisangile apalembelewe ati,¹⁸"Umupashi wakwa Shikulu uli pali nebo, pantu alinsubile ukubila imbila insuma ku babusu. Alintumine ukuya kubila ukulubulwa kuli bankole no kubweshesha ukumona ku mpofu, ukukakula abo abanyantililwa, ¹⁹ukubila umwaka wa bubile bwakwa Shikulu." ²⁰Nolu alipombe umufungilo, alibweshe kuli kangalila, kabili alikeleko. Amenso ya bonse abali mu sunagoge yalitontele pali ena. ²¹Alitendekele ukulanda kuli bena ati, "Ubwalelo ili lembo lyafikilishiwa mu matwi yenu." ²²Bonse kulya balilandile ifyabune pali ena kabili bali sungwike pa fyebo fya kusenamina ifyali kufuma mukanwa kakwe, kabili balipwishe ati, "Bushe uyu tali mwana mwaume wakwa Yosefe?" ²³Alilandile kuli bena ati, "Mucine mwalangumina ilipinda, 'Kondapa, yundape we mwine. Fyonse ifyo twaumfwile wacitile mu Kapenaumu, cita fimo fine mu mushi obe.'" ²⁴Lelo alilandile ati, "Mucinefy nkolanda kuli mwebo nati, takuli kasesema uupokelelwa mu mushi wakwe." ²⁵Lelo mucine nkomweba nati mwali bamuka mfwilwa abengi mu Isreali mu nshita yakwa Eliya, ulo umulu waiselwe pa myaka itatu ne myeshi mutanda ne cipowe cikalamba caliponene pa calo conse. ²⁶Lelo Eliya tatuminwe ku uli onse pali bena, lelo kanofye ku Sarefati mu Sidone, kuli mukamfwilwa uwalikwikala mulya. ²⁷Kwali abafibashi abangi mu Isreali pa nshita yakwa Elisha kasesema, lelo tapali nangu umo uwa sangulwilwe kanofye Naamani umwina Syria." ²⁸Bonse abantu abali mu sunagoge baliswilemo icipyu ulo baumfwile ifi fintu. ²⁹Balimine, no kumutamfya mumushi, no kumutwala ku cipuma ca lupili apo umushi wabo wakulilwe, pakweba ati baye kumuposa ukufuma pa cipuma ca lupili. ³⁰Lelo alipitile pakati kabo kabili alile ku ncende imbi. ³¹Ulo atentemukile ku Kapenaumu, umusumba wa mu Galili, kabili alitendekele ukubasambilisha pe Sabata. ³²Balisungukile pa misambilishishe yakwe, pantu alikulanda ne nsambu. ³³Nomba mu sunagoge mwali umwaume uwali no mupashi wakukowela, kabili alilile ne shiwi ilikalamba ati, ³⁴"Yaku ee! Nindo tukofwaika ukucita na webo, we Yesu waku Nasareti? Bushe ulishile mukutonaula? Ndikwishibile webo - uli wa Mushilo wakwa Lesa!" ³⁵Yesu alikalipile ingulu, ukweba ati, "Talala! Fumamo muli ena!" Ulo ingulu yaponeshesha umwaume panshi pakati kabo, yalifuminemo muli ena, kabili tayamucenene mu musango uuli onse. ³⁶Abantu bonse balipapile sana, kabili balitwalilile ukulandapo umo no munankwe. Balilandile ati, "Fyebo fya musango shani ifi? Alakalipila imipashi yakukowela mu nsambu na maka nayo ilafumamo." ³⁷Eco ilyashi pali ena lyalitendekelele ukusabankana mu citungu ca shinguluka. ³⁸Nolu Yesu alifumine mu sunagoge no kwingila mu ng'anda yakwa Simone. Nomba nafyala wakwa Simone alikucushiwa ne mpepo iikalamba nganshi, kabili balimupapatileko kuli ena. ³⁹Eco

aliminine pali ena no kukalipila impepo, kabili yalimushile. Apopenefye alimine kabili alitendeke ukubapyungila.⁴⁰Ulo akasuba kalikuwa, abantu baliletele kuli Yesu bonse abalwele amalwele ayakulekana - lekana. Alibikilepo indupi shakwe pali bonse no kubaposha.⁴¹Ingulu nasho shalifuminemo mu bengi, shikopunda no kulanda ati, "Uli Mwana wakwa Lesa!" Yesu alikalipile ingulu kabili talikushisuminisha ukulanda, pantu shalishiibile ukwebati ni Kristu.⁴²Ulo ubushiku bwacele, alile ku ncende ya fisama. Amabumba ya bantu yalikumufwaya no kwisa ku ncende uko ali. Balyeshe ukumukanya ukuya ukufuma kuli bena.⁴³Lelo alilandile kuli bena ati, "Mfwile ukubila imbila nsuma palwa bufumu bwakwa Lesa naku misumba iingi naimbi, pantu uyu emulandu natuminwe kuno." ⁴⁴Nolu alitwalilile ukushimikila muma sunagoge ukupita monse mu Yudea.

5

¹Nomba calicitike ulo abantu balikuititika ukushinguluka Yesu no kumfwa ku cebo cakwa Lesa, aliiminine pa mbali ya bamba wa Gennesareti. ²Alimwene amato yabili ayo bakakile pa mpela ya bamba. Abashila balifuminemo kabili balikusamfya masumbu yabo. ³Yesu alingile mu bwato bumo, ubwali bwakwa Simone, kabili alimwipwishe ukubutalushako panono ku mulundu ukuyako mu menshi. Elo aikeleko mubwato no kusambilisha abantu.⁴Ulo apwishishe ukulanda, alilandile kuli Simone ati, "Twala ubwato pa menshi ayakushika no kuposa amasumbu yenu ku kwikata." ⁵Simone alyasukile ati, "Shikulu, tubombe ubushiku bonse no kukana ikata nangu kamo, nomba pa cebo cenu, nkoteya amasumbu." ⁶Ulo bacitile ifi, balikete isabi ilingi, na masumbu yabo yalikulepuka. ⁷Eco balicebishe abanabo mu bwato bumbi ukwebati bengesa kubafwilishako. Balishile no kwisusha yonse yabili amato, icakwebati balitendekele ukubunda.⁸Lelo Simone Petero, ulo amwene ifi, aliwile pa makasa yakwa Yesu, ukulanda ati, "Fumeni kuli nebo, pantu ndi muntu umubumbu, mwe Shikulu." ⁹Pantu ena na bonse abali nankwe balipapwike pa kwikata kwe sabi ilyo basendele. ¹⁰Na bambi bali ni Yakobo na Yohane, abana baume bakwa Sebede, abali kwampama na Simone. Yesu alilandile kuli Simone ati, "Witina, pantu ukufuma lelo ukoba umulondo wa bantu." ¹¹Ulo baletete amato yabo ku mulundu, balishile fyonse no kumukonka.¹²Calishile kuba ukwebati ulo ali mu musumba umo, umwaume uwalwele ifibashi alikulya. Ulo amwene Yesu, aliwile ubunkupeme no kumupapata, alilandile ati, "mwe Shikulu, umfwa mukofwaya, kuti mwansangulula." ¹³Elo Yesu atambalike ukuboko kwakwe no kumwikata, ukulanda ati, nkofwaya. Sangululwa." Apopenefye ifibashi fyalipolele.¹⁴Alimukonkomeshe ukukana eba nangu umo lelo alimwebele ati, "Kabiye munshila yobe, nokuya kuilanga kuli shimapepo no kupela ilambo palwa kusangululwa kobe, ukulingana nefyo Mose akonkomeshe, ukubo bunte kuli bena." ¹⁵Lelo ululumbi lwakwe lwalisalanineko, na mabumba ya bantu ayakalamba yali kolongene capamo ku kumumfwa akosambilisha no kundapwa ku malwele yabo. ¹⁶Lelo ilingi alikubasha nokuya ku ncende yakutalala tondolo no kupepa.¹⁷Calishile kubati pa bushiku bumo munshiku shilya ati ali kusambilisha, kabili kwali aba Falise naba kasambilisha ba malango abaikela kulya abaishile ukufuma kuli cila mushi wa mu Galili na mu Yudea no kufuma ku Yerusalemu. Amaka yakwa Shikulu aya bundapa yali nankwe.¹⁸Nomba abaume bamo abaishile balisendele pa butanda umwaume uwali no bulebe, kabili balifwaile inshila shakumwingisha mukati no kumulalika panshi kuntashi yakwa Yesu. ¹⁹Balifililwe ukusanga inshila yakumwingishishamo mukati pamulandu we bumba, eco baninine pamutenge bamupisha mu ngelwa shakupapatala, pa butanda bwakwe, mukati ka bantu, ku mulola wakwa Yesu.²⁰Pakumone cicetekelo cabo, Yesu alilandile ati, "We mwaume, imembu shobe shaelelwa." ²¹Bakalemba na baFarise balitendekele ukwipusha ici, bakolanda ati, "Ninani uyu ukolanda ifyamiponto? Ninani wingelela imembu kanofye Lesa eka?" ²²Lelo Yesu, pakwishiba ifyo bali kutontonkyanya, alyasukile no kulanda kuli bena ati, "Nindo mukoipusha ici mumitima yenu?" ²³Cindo cayanguka ukulanda, 'Amasambi yobe yaelelwa' nangula ukulanda ati 'Ima no kwenda?' ²⁴Lelo pakwebati mwingeshiba ati Umwana wa Muntu alikwata amaka pe sonde ayakwelela imembu," - alilandile ku mwaume wabulebe ati - "Nakweba, ima, senda ubutanda bobe nokuya ku ng'anda yobe." ²⁵Apopenefye aliminine ku ntanshi yabo kabili alimishe ubutanda ubo alelepo. Nolu alile ku ng'anda yakwe, akolumbanya Lesa. ²⁶Bonse balisungukile kabili balilumbenye Lesa. Baliswilemo no mwenso, ukulanda ati, "Twamone fintu fyakupapa ilelo." ²⁷Panuma ifi fintu fyacitika, Yesu alifumineko kulya no kumona kasonkesha wa misonko uweshina Iya Lebi alikele mwi tenti lyaba kasonkesha ba misonko. Alilandile kuli ena ati, "Nkonka." ²⁸Eco Lebi alimine no kumukonka, alishile fyonse kunuma.²⁹Nolu Lebi alipekanishishe Yesu umutebeto uukalamba mu ng'anda yakwe. Kwali ba kasonkesha ba misonko abengi kulya na bantu bambi abalikukuwama pe tebulo no kulya nabo. ³⁰Lelo abaFarise na bakalemba babo balikuilishanya ku basambi bakwe, ukulanda ati, "Nindo mulila no kunwa pamo na bakasonkesha ba misonko na babembu?" ³¹Yesu alibasukile ati, "Abantu abatalwele tabafwaya shinganga; kanofye abo abalwele." ³²Nshaishile kukukuta abalungami, lelo ababumbu kukulapila." ³³Balilandile kuli ena ati, "Abasambi bakwa Yohane ilingi balafunga no kupepa, na basambi babaFarise bacita cimo cine. Lelo abasambi bobe balalya no kunwa." ³⁴Yesu alilandile kuli bena ati, "Bushe uuli onse engalenga abakwa shibwinga abeshile ku bwinga ukufunga ulo shibwinga acili nabo?" ³⁵Lelo inshiku shikoisa ulo shibwinga akasendwa kumbi ukufuma kuli bena, elo muli isho inshiku bakafunga." ³⁶Nolu Yesu alibomine umulumbe. "Takwaba uulepulako akapimfya ku nsalu iipya no kukabomfya ukukambika insalu ya kale. Nga acita ifyo, akalepula insalu iipya, na kasalu kakafuma ku nsalu iipya takakalinge ku nshalu ya kale." ³⁷Takuli uubika umwangashi upya mu nsupa sha mwangashi ishakale. Umfwa acita ifyo, umwangashi upya kuti walepula insupa, no mwangashi kuti waitika, ne nsupa sha mwangashi shikonaika. ³⁸Lelo umwangashi upya ufwile ukubikwa mu nsupa sha mwangashi ishitya. ³⁹Takuli nangu umo panuma ya kunwa umwangashi uwakale enga fwaya uupya, pantu alanda ati, "uwakale wabune."

¹Nomba calicitikile pa bushiku bwe Sabata ukwebati Yesu alikupita mu mabala ya ng'ano, na basambi bakwe balikutempula imitwe ya ng'ano, ukulekufikina mu minwe yabo, no kulya ing'ano. ²Lelo bamo mu baFarise balilandile ati, "Nindo mukocitila icintu icishasuminishiwa ukucitwa pa bushiku bwe Sabata?"³Pakubasuka, Yesu alilandile ati, "Bushe tamwabelenga ifyo Dabidi acitile ulo aumfwile insala, ena na baume ali nabo? ⁴Alingile mu ng'anda yakwa Lesa no kubula umukate waceni no kulyapo umo, no kupela umbi ku baume ali nabo ukulya, nangula casuminishiwebye ukwebati ba shimapepo ebakulya." ⁵Nolu alilandile kuli bena ati, "Umwana wa Muntu e Shikulu we Sabata."⁶Calicitikile na pe Sabata limbi ukwebati alile mu synagoge no kusambilisha abantu mulya. Mulya mwali umwaume uwali ne cisansa cakuma. ⁷Bakalemba na baFarise balikumulolekesha ukumona nga cakwebati akoposha uuli onse pe Sabata, pakwebati bakwate apa kumushinina. ⁸Lelo alishibile ifyo balikutontonkanya kabili alilandile ku mwaume uwali ne cisansa cakuma ati, "Ima no kwiminina pano pakati ka bonse." Eco umwaume alimine no kwiminina palya. ⁹Yesu alilandile kuli bena ati, "Nkomwipusha, bushe calisuminishiwa ukucita icabune pe Sabata nangula kucita ica bubi, ukupususha umweo nangu ukuulofya?" ¹⁰Nolu alilolekeshe ukushinguluka pali bonse no kulanda ku mwaume ati, "Tambullula ukuboko kobe." Alilitile ico, no kuboko kwakwe kwali bwekelepo. ¹¹Lelo baliswilemo icipyu cabula mano, kabili bali kulanshanya abene nabene pafyo bengacita kuli Yesu. ¹²Calicitikile muli isho nshiku ukwebati alifumine no kuya ku lupili mukupepa. Alikonkenyepo ubushiku bonse ukupepa kuli Lesa. ¹³Ulo bwacile, alikutile abasambi bakwe kuli ena, no kusalapo abali ikumi na babili, abo kabili ainikile abatumwa. ¹⁴Amashina ya batumwa yali Simone (untu ainikile Petero) na munyina Andrea, Yakobo, Yohane, Filipi, Bartolomeo, ¹⁵Mateo, Toma, Yakobo umwana mwaume wakwa Alfeo, Simone uwalikwitwa Selote, ¹⁶Yuda umwana mwaume wakwa Yakobo, na Yuda Iskariote, uyo uwaishile ku mubemba. ¹⁷Nolu Yesu alitentemukile nabo ulupili no kwiminina pa ncende iyakubatama ne bumba ilikalamba ilya basambi bakwe ne mpendwa iikalamba iya bantu ukufuma mu Yudea na mu Yerusalema na mu mbali ya bemba wa ku Turi na Sidone. ¹⁸Balishile kuku kutika kuli ena no kuposhiwa ku malwele yabo. Abantu abali kucushiwa ne mipashi iya kukowela nabo bene balipolele. ¹⁹Uuli onse mwibumba alikweshwa ukumukumya pantu amaka ya kuposha yalikufuma muli ena, kabili alibaposeshe bonse. ²⁰Nolu aliloleshe pa basambi bakwe no kulanda ati, "Mwalipalwa mwe babusu, pantu ubufumu bwakwa Lesa bwenu. ²¹Mwalipalwa mwe bali ne nsala pali nomba, pantu mukekushiwa. Mwalipalwa mwe bakolila pantu mukaseka. ²²Mwalipalwa ulo abantu bamipata, nolo bamikana no ku misalula no kukana ishina lyenu nge lya bubifi, pamulandu wa Mwana wa Muntu. ²³Sekeleleni muli bulya bushiku kabili cilaukeni ne nsansa, pantu icinefyemuli no kukwata icilambu icikalamba mumulu, pantu ifikolwe fyabo fyalicitile cimo cine kuli ba kasesema. ²⁴Lelo akalanda kuli mwebo mwebafyuma, pantu muli pokelele kale ukusansamuka kwenu. ²⁵Kalanda kuli mwebo mwe bekutile pali nomba, pantu mukaba ne insala kuntanshi. Kalanda kuli mwebo mwebakoseka pali nomba pantu mukaloshi no kulila kuntanshi. ²⁶Akalanda kuli mwebo ulo abantu bonse basosa ifyabune pali mwebo, pantu nifyo fine ifikolwe fyabo fyalicitile kuli ba kasesema babufi. ²⁷Lelo nkolanda kuli mwebo mweba kokutika ati, temweni abalwani benu no kucita icabune ku ba mipata. ²⁸Paleni abo abamitipa no kupepela abo abamicusha. ²⁹Kuli uyo wakuma kwi saya limo, mupele neli nankwe. Nga umo akusendela ilaya, wimukanya no mwingila obe wine. ³⁰Pela kuli onse uwakulomba. Umo nga akusendela ifintu ifili fyobe, wimwipusha ukukubwesha. ³¹Ifyo ufwaya abantu bacite kuli webo, ufwiye ukucita cimo cine kuli bena. ³²Umfwa watemwafye abantu abakutemwa, cilambu ndo cili pali webo? Pantu naba bembu bene batemwafye abo aba batemwa. ³³Umfwa wacita icabune ku bantu fye abacita ifyabune kuli webo, cilambu ndo cingaba pali webo? Pantu na babembu bacita cimo cine. ³⁴Umfwa wakongweshwa fye abantu abo ukosubila ukukubwesha, cilambu ndo cili pali webo? Na ba bembu bakongweshwa ku babembu, kuku pokelela icipendo cimo cine. ³⁵Lelo temweni abalwani benu no kucita ifyabune kuli bena. Kongweshwa, ukukana subila ukukubwesha ifili fyonse, ne cilambu cenu cikaba icikalamba, kabili mukaba abana ba Wapulam, pantu ena umwine aliba ne nkumbu kubashitotela na bantu ababifi. ³⁶Mube abaluse, ngefyo Shinwe aba no luse. ³⁷Mwipingula, na mwebo tamwakapingulwe. Mwiseka, na mwebo tamwakasekwe. Eleleni bambi, na mwebo mukelelwa. ³⁸Peleni, kabili cikapelwa kuli mwebo. Umulingo wabune - uwakushindailwa, uwakusunkanishiwa kabili uwakusempauka - e fiketulukila mu ceni cenu. Pantu ku mulingo mupiminako, e mulingo mukapiminwako na mwebo." ³⁹Nolu alibelele mulumbe nakabili. "Bushe impofu kuti yatungulula impofu inankwe? Umfwa yacita ifyo, bonse kuti baponena mu cilindi, bushe tekuti baponenemo? ⁴⁰Umusambi tacila pali kasambilisha wakwe, lelo onse ulo asambilishiwa ukufikapo akabafye cimo cine nga kasambilisha wakwe. ⁴¹Nindo ulolesesha akapapa akanono akatobola mu linso lyakwa wenu, lelo taumona umulando uutobola mu linso lyobe? ⁴²Kuti walanda shani kuli wenu ati, 'Munyina, leka mfunye akapapa mu linso lyobe, ulo webo wemwine taumwene umulando uli mulinso lyobe? Mwebabubi munda! Bala fumya umulando mu linso lyobe, elo walamona bwino ukufumya akapapa akali mu linso lyakwa wenu.' ⁴³Pantu takwaba icimuti cabune icitwala ifisabo fya bubi, nangula icimuti cabubi icitwala ifisabo fya bubi. ⁴⁴Pantu cila cimuti caishibikilwa ku fisabo citwala. Pantu abantu tabasaba makunyu ku myunga, nangula ukusaba ifisabo fya myangashi ku cimuti ca myunga. ⁴⁵Umuntu wabune ukufuma mu cipao cabune ica mutima wakwe afumye fya bubi, no muntu mubi ukufuma mu cipao cabubi ica mutima wakwe afumya ifyabubi. Pantu ukufuma mubwingi bwafya mu mutima wakwe efyo akanwa kalalanda. ⁴⁶"Nindo munkutika ati, 'Shikulu, Shikulu,' lelo tamubela ifintu ifyo myeba? ⁴⁷Umuntu onse uwisa kuli nebo no kumfwa ifyebo fyandi no kufibela, nkomweba ifyo aba. ⁴⁸Ali ngo muntu ukokula ing'anda, uwaimbishe panshi mu mushili no kukula umufula wa ng'anda pa mwalala. Ulo ilyeshi lyaishile, umukuku wakonkolweke mu mbali ya ng'anda lelo tawaisunkenye, pantu yalikulilwe bwino. ⁴⁹Lelo umuntu uumfwa ifyebo fyandi

no ku kanafibela, alipamo nga umuntu uwakulile ing'anda pa mulu wa mushili ukwabula umufula. Ulo umukuku wakonkolokele pa ng'anda ilya, apopenefye yalibongolweke, ne ng'anda ilya yalyonaike umupwilapo."

7

¹Panuma Yesu apwishishe fyonse alikulanda mu matwi ya bantu, alingile mu Kapernamu.²Nomba umukalamba wa fita alikwete umusha uwali uwa kucindama kuli ena, kabili alilwele mupepi no kufwa. ³Ulo umukalamba wa fita aumfwile pali Yesu, alitumine abakalamba baba Yuda, ku kumulomba aye kumundapilako umubomfi wakwe. ⁴Ulo baishile kuli Yesu, balimwipwishe mukupapatila, ukwebati, "Alilingile mwebo ukuya kumucitila ici, ⁵pantu alitemwa uluko lwesu, kabili ewatukulile synagoge." ⁶Eco Yesu alile palwendo nabo. Lelo ulo alamine ku ng'anda, umukalamba wa fita alitumine abanankwe ukulanda kuli ena ati, "Mwe Shikulu, mwiicusha, pantu nshilingile ukwebati mwingesa mu ng'anda yandi. ⁷Pali mulandu wa ici nshaciitunga ukuba uwalinga ukwisa kuli mwebo, lelo landenipofye icebo no mubomfi wandi akopola. ⁸Pantu na nebo ndi muntu wa nsambu, na ba shilika abo ntungulula. Ndalanda kuli umo ati, "Kabiye," kabili alaya, nakuli umbi, 'Isa,' kabili alesa, na ku mubomfi wandi, 'Cita ici,' kabili alacitila." ⁹Ulo Yesu aumfwile ifi, alisungukile pali ena, napa kupilibukila kwi bumba lyali kumukonka alilandile ati, "Nkolanda kuli mwebo nati, nangulafye ni mu Isreali, nshasangamo icicetekelo icakuba ngeci." ¹⁰Ulo balya batuminwe babwelele ku ng'anda, balile kusanga umubomfi alipolele. ¹¹Panuma ya ifyo, Yesu alile ku mushi walikwitwa Naini, na basambi bakwe ne bumba ili kalamba lyalile nankwe. ¹²Pakupalamina mupepi ne mpongolo ya mushi, moneni, umwaume wakufwa bali musendele, umwana mwaume umofye mpo uwa kwa nyina (Uwali mukamfwilwa), ne bumba ilya kulileko ukufuma mu mushi lyali pamo nankwe. ¹³Ulo Shikulu amu mwene, aliketwe nkumbu ngashi pali ena no kulanda kuli ena ati, "Wilalila." ¹⁴Elo aile kwikata kumacila apo basendele icitumbi, nabo abacisendele bali minine ndii. Alilandile ati, "We mulumendo, nalanda kuli webo nati, "Buka." ¹⁵No wafwile alibukile alitendele ukulanda, na Yesu ali mupele kuli nyina. ¹⁶Nolu umwenso walibekete bonse, kabili balitwalilile ukulekulumbanya Lesa, ukwebati, "Kasesema umukalamba alimine pakati kesu" na "Lesa alilolekeshe pa bantu bakwe." ¹⁷Ili yashi ilya pali Yesu lyali salangene Yudea yonse ne fitungu fyonse ifya bena mupalamano. ¹⁸Abasambi bakwa Yohane balimwebele pali ifi fintu fyonse. Nolu Yohane alikutilepo babili pa basambi bakwe ¹⁹no kubatuma kuli Shikulu ku kwipusha ati, "Bushe nimwebo muli no kwisa, nangula tufwile ukulolela umbi?" ²⁰Ulo bapalamine kuli Yesu, abaume balilandile ati, "Yohane kabatisha alitutumine kuli mwebo ku kumipusha ati, "Bushe nimwebo muli no kwisa, nangula tufwile ukulolela umbi?" ²¹Muli ilya nshita aliposeshe abantu abengi ku malwele ne fyakucushiwa na ku mipashi ya kowela, na ku mpofu ishingali alipele amenso. ²²Yesu alyasukile no kulanda kuli bena ati, Ulo mukobwekelamo, muye kulanda kuli Yohane ifyo mumwene nefyo mumfwile. Impofu shikomona, ifilema fikoenda, abafibashi bakosangululwa, bankomya matwi bakoumfwa, abakufwa bakobushiwa ku mweo, na babusu bakoebwa imbila nsuma. ²³Umuntu uutaleka ukucetekela muli nebo pa mulandu wa ficitwa fyandi alipalwa. ²⁴Panuma inkombe shakwa Yohane shaya, Yesu alitendeleke ukweba amabumba palwa kwa Yohane, "Findo mwaile kumona mu matololo? Itete ilitenshiwa ku mwela? ²⁵Lelo findo mwaile mukumona? umuntu uufwala insalu ishakunakilila? Lolesheni, abo abafwala insalu ishalumo mutengo no kwikala ubwikalo bwabune bekala mu cipango ca mfumu. ²⁶Lelo nindo mwaile mukumona? Ni kasesema? Eee, nalanda kuli mwebo nati, no kucila pali kasesema. ²⁷Uyu ni uyo wine uo calembelwa ati, 'Moneni, nkotuma inkombe kuli mwebo, uwakumipekanishisha inshila.' ²⁸Nkolanda kuli mwebo nati, pali bonse abafyalwa ku mwanakashi tapalipo uwakucila Yohane. Lelo uwacepesha mu bufumu bwa kwa Lesa mukalamba ukucila ena." ²⁹(Ulo abantu bonse baumfwile ifi, ukubikapofye na bakasonkesha ba misonko, balilandile ukwebati Lesa wakulungama, pantu balibatishiwe no lubatisho lwa Yohane. ³⁰Lelo abaFarise ne censhi sha malango balikene ubuyo bwakwa Lesa pali bena, pantu taba batishiwe kuli Yohane.) ³¹"Nikufindo, nolu, uko ninga palanya abantu baino nkulo? Baba kubati ni findo? ³²Baba kubati baice abakoangalila pa cisankano, abekala no kulaikukuta umo no munankwe no kulanda ati, twalimilishishe ifimpeta na mwebo ta mwacindile. Twalimbile ulwimbo lwakullosha, na mwebo tamwalilile. ³³Pantu Yohane kabatisha alishile uwakubulo kulya umukate no kunwa umwangashi, kabili mwalandile ati, 'Alikwete ingulu.' ³⁴Umwana wa Muntu alishile akolya no kunwa mwalilandile ati, 'Moneni, uyu muntu muliili kabili ni cakolwa, munabo wa bakasonkesha na babembu!' ³⁵Lelo mano alaisokolola ukuba uwa cine mubana ba bakwe. ³⁶Nomba umo uwa mu baFarise alilalike Yesu ukuya kulya nankwe. Eco panuma Yesu alingile mung'anda ya mu Farise, alikuweme kwi tebulo kukulya. ³⁷Moneni, kwaliko umwanakashi mu musumba uwali umubembu. Ulo aishibe ukwebati Yesu alikuweme kwi tebulo mung'anda ya mu Farise, aliletele ibotolo lya mafuta yacena cabune. ³⁸Ulo aishilekwiminina kunuma mupepi na makasa yakwe, akoliila, alitendeleke ukubomfya amakasa yakwe ku filamba fyakwe, no kuya kumuna no mushishi wakwe nokuyatomona no kuyasuba na mafuta yacena cabune. ³⁹Ulo umuFarise uwalalike Yesu amwene ifi, alitontontenye umwine, ukwebati, "Umfwa uyu muntu ni kasesema, ngalishibile umusango wa uyu mwanakashi akomwikata abelamo, ukwebati mubembu." ⁴⁰Yesu alimwasukile no kumweba ati, "Simone, ndikwete ifyo nkofwaya ukulanda kuli webo." Alilandile ati, "Cilandeni, Mwe kasambilisha!" ⁴¹Yesu alilanda ati, "Kakongweshwa umo ali na bamisha babili. Umo alimukwatite indalama imyanda isano, no munankwe amakumi yasano. ⁴²Ulo bafililwe ukupilila alibabelele uluse bonse babili. Eco, ninani uwinga mutemwisha sana?" ⁴³Simone alimwasukile no kulanda ati, "Namona kubati untu alekelele ishing'u." Yesu alilandile kuli ena ati, "Walungika." ⁴⁴Yesu alipilibukile ku mwanakashi no kulanda kuli Simone ati, "Uli mumwene uyu mwanakashi. Ndingile mu ng'anda yobe. Taumpele amenshi ya kusamba makasa, lelo alibomfeshe amakasa ku filamba fyakwe no kuyankumuna ku mushishi wakwe. ⁴⁵Tauntomwene, lelo ukutulafye apo ngishile talekelepo kutomona amakasa shandi. ⁴⁶Taunsubilepo mafuta ku mutwe, nomba ena alinsubile ku makasa

amafuta ya cena cabune.⁴⁷ Pamulandu wa ici nkolanda kuli webo nati, imembu shakwe, ishali ishing, shilyelelwe - pantu alanga ukutemwa sana. Lelo uwaalelwa panono, atemwako panono.⁴⁸ Nolu alilanda kuli ena ati, "Imembu shobe shaelelwa."⁴⁹ Nabo abakuweme pamo balitendeke ukusoshanya abene ati, "Ninani uyu uwakwebati akoelela ne membu?"⁵⁰ Nolu Yesu alilandile ku mwanakashi ati, "Icicetekelo cobe cakupususha. Kabiye mu mutende."

8

¹Calicitikile panuma Yesu alitendeke ukwenda ukushinguluka mu misumba ne mishi iyakulekana lekana, ukushimikila no kubila imbila nsuma palwa bufumu bwakwa Lesa. Abekumi na babili bali nankwe, ²Kumofye na banakashi abaundepwe ku mipashi ya kukowela na malwele: Maria uo balikukuta umwina Magadala, uo bafumishemo ingulu cinelubali; ³Yoana, umukashi wakwa Chusa, kangangalila wakwa Helode; Susana; na bambipo, abo, ukufuma mu fikwatwa fyabo, bali kubapela ifya kukabili kwabo.⁴Ulo ibumba lya bantu ilikalamba lyalongene, na bantu balikwisa kuli ena ukufuma mu mushi no mushi, alibelele umulumbe ati: ⁵"Umulimi alile mu kubyala imbuto. Ilyo abyele, shimo shaliponene mu mbali ya musebo kabili shalinyantawilwepo ku makasa, ne fyoni fya mulwelele fyalishilile." ⁶Shimo shaliponene pe bwe, na panuma ya kukula, shalyumine, pantu tashakwete umutonshi.⁷Shimo shaponene mu myunga, ne myunga yalikulile pamo ne mbuto no kushitabilila. ⁸Lelo shimo shaliponene pa mushili wabune no kutwalika ifisabo ifyali nalimo umwanda mu bwingi." Panuma Yesu alanda ifi fintu, alipundile ati, "Onse uuli na matwi yakumfwa, naomfwe."⁹Abasambi bakwe balimwipwishe ifyo umulumbe walikupilibula. ¹⁰Alilandile ati, "Ubwishibilo bwafya nkama fya bufumu bwakwa Lesa bwalipelwa kuli mwebo, lelo kuli bambi nandila mu milumbe, pakwebati 'balekulolesha ukwabula ukumona, no kumfwa ukwabula ukwiluka."¹¹Nomba ubu ebupilibulo bwa mulumbe: Imbuto cebo cakwa Lesa. ¹²Isha mu mbali ya musebo ni abo abaumfwa, lelo kasebanya alesa no kusompola icebo mu mitima yabo pakwebati bakane ukusumina no kupusuka. ¹³Isha pa mabwe ni abo, ulo baumfwa icebo, bacipokelela ne nsansa. Lelo tabakwete imishila; balasumina pa kashita akanono, na munshita ya kweshiwa balawa.¹⁴Imbuto ishaponene mu myunga bantu abomfwa icebo, lelo ilyo bakoya mu nshila yabo, batomposhiwa na malangulushi ne fyuma ne fya mangalo ya bwikashi buno, ne fitwalo fyabo tafikula. ¹⁵Lelo imbuto ishaponene pa mushili wabune, aba ebamo abo, abomfwa icebo umufuma cumi ne mitima iyabune, bacikatisha no kutwala ifisabo mu kushipikisha ukulolela.¹⁶Takwaba uwasha inyali no kufimbako imbakuli nangu ukubika mwisamba lya musengele. Lelo, alabika pa cakubikapo inyali pakwebati onse uukoingila alekumona ulubuto. ¹⁷Pantu takwaba icakufisama icishakeshibikwe, nangu icili conse icankama icishakeshibikwe no kwisa apakubuta. ¹⁸Eco umfwikisheni, pantu umo uwakwata, ifingi fikapelwa kuli ena, lelo kuli uyo uutakwata, nefyo atontokanya ati alikwata fikapokololwa kuli ena."¹⁹Nolu nyina na bamunyina balishile kuli ena, lelo balifililele ukupalamina kuli ena pa mulandu we bumba. ²⁰Balimwebele ati, "Banoko na bamunonko baliminine panse, bakofwaya ukukumona." ²¹Lelo Yesu alibasukile no kulanda kuli bena ati, "Bamayo na ba munyina ni abo abomfwa icebo cakwa Lesa no kucicita." ²²Nomba ubushiku bumo alininine mu bwato na basambi bakwe, no kulanda kuli bena ati, "Natulekuya kwi shilya lya cimana." Balitampile ukwabuka. ²³Lelo ulo balikuya Yesu alisendeme. Icipupu icikalamba calishile kupona pa cimana, no bwato bwabo bwalikwisulamo na menshi, kabili bali mu busanso.²⁴Nolu abasambi bakwa Yesu balishile kuli ena, no kumubusha, ukwebati, "Shikulu! Shikulu! tuli mu kufwa!" Alyalamukile no kukalipila umwala na mabimbi ya menshi, kabili yalilekele, kabili kwali talele. ²⁵Nolu alilandile kuli bena ati, "Icicetekelo cenu cili pii?" Lelo balitininine no kusunguka, kabili balipushenye umo no munankwe ati, "Uyu ninani kanshi, uwakwebat ukonkomesha na mabimbi na menshi, kabili fikomubela?"²⁶Balile kufika ku citungu ca bena Gerasa, icapulinkanya mu mumana wafuma ku Galili. ²⁷Ulo Yesu ayabukile ku mulundu, balimukumenye ku mwaume wa kufuma lmu musumba uwali ne ngulu. Pantu pa nshita ntali tali kufwala ifyakufwala, kabili talikwikala mu ng'anda lelo alikwikala mu manda.²⁸Ulo amwene Yesu, alipundile no kuwila pali ena no kulanda ne shiwi ilikalamba, "Cinshi ukofwaya ukucita kuli nevo, Yesu, we Mwana wakwa Lesa Uwapulamo? Nkokupapata, wincusha." ²⁹Pantu Yesu alikonkomeshe umupashi wa kukowela ukufuma mu muntu. Pantu inshita ishing walikumwikata, kabili nangu bali mukakile ne minyololo ne myando no kumusunga mu bulinde, alikuputula iminyololo yakwe kabili alikutungululwa ne ngulu mu matololo.³⁰Nolu Yesu alimwipwishe ati, "Niwebo nani ishina?" Alilandile ati, "Itulwe," Pantu ingulu ishing shalimwingile. ³¹Shalitwalililepo ukumupapata ukwebati eshikonkomesha ukuya kumbo.³²Nomba ibumba lya nkumba lyali likolya ku lupili lubali. Ingulu shalimupapatile ukwebati ashileke shilekuya muli shena, kabili alishisuminishe. ³³Eco ingulu shalifumine mu muntu no kuya mu nkumba, ne nkumba shalibutukile ku matelo ya cimana no kunwina.³⁴Ulo abalikumona inkumba bamwene ifyacitike, balifulumwike balile bakobilikisha mu misumba na kunse ya mushi. ³⁵Eco abantu balile mukumona ifyacitikele, kabili balishile kuli Yesu no kuyasanga umuntu uo ingulu shafuminemo. Alikeleko pa makasa ya kwa Yesu, alifwele kabili ninshi alibwele mubutuntulu; kabili balyumfwile umwenso.³⁶Nolu abo abasangilweko balibalondolwelele fintu umuntu uwaiketwe ne ngulu aundepwe. ³⁷Nolu abantu bonse aba mu citungu ca Gerasa balipwishe Yesu ukwebati afume kuli bena, pantu balipapwike no kutina apakalamba. Eco alingile mu bwato no kubwelelamo.³⁸Umuntu uo ingulu shafuminemo alile no kupapata ukwebati amusuminishe balekuya nankwe, lelo Yesu alimutamfishie, alilandile ati, ³⁹"Bwelelamo ku ng'anda no kuya kubalondolwela fyonse ifyo Lesa acitile pali webo." Umwaume alile munshila yakwe, akobilikisha ukupita monse mu musumba ifyo Yesu amucitile.⁴⁰Nomba ulo Yesu abwelele, ibumba lyalimupokelele, pantu bonse balikumwekela. ⁴¹Moneni, umwaume we shina lya Yailo, ali ni umo pa ntungulushi sha mu synagoge, alishile no kuwila pa makasa yakwa Yesu, no ku mupapata ukwebati ese ku ng'anda yakwe ⁴²pantu umwana wakwe umwanakashi umofye, umukashana uwa malimo imyaka ikumi na ibili alikushikila. Ulo Yesu ali akoya mu nshila, ibumba lya bantu

lyalikuititika ukumushinguluka.⁴³Nomba kwaliko namayo uwali kusuma umulopa pa myaka ikumi na ibili kabili aliposele indalama shakwe shonse kuli bashing'anga no kundapwa nakalya ku uli onse. ⁴⁴Alishile kunuma ya kwa Yesu no kwikata ku lutwe lwe laya lyakwe, na popenefye ukusuma umulopa kwalilekele. ⁴⁵Yesu alilandile ati, "Bushe ninani anjika?" Ulo bonse bakene, Petero alilandile ati, "Mwe Shikulu, ibumba lya bantu balimishingulwiwe kabili bacomutitikisha." ⁴⁶Lelo Yesu alilandile ati, "Umuntu umo alinjikete, pantu ndyumfwile amaka yafuma muli nevo." ⁴⁷Ulo Umwanakashi amwene ukwebati tafiseme ukukana mwishiba, alishile akotutuma no kuwa pali ena. Pa menso ya bantu bonse alilandile umulandu amukumishe na fintu akwete ukundapwa apopenefye. ⁴⁸Nolu alilandile kuli ena ati, "We mwana mwanakashi, icicetekelo cobe cilikundepe. Kabiye mu mutende." ⁴⁹Ulo acili akolanda, umo alishile ukufuma ku ng'anda ya ntungulushi ya mu synagoge, ukulanda ati, "Umwana wenu umwanakashi alifwile. Mwitwalilila ukucusha kasambilisha." ⁵⁰Lelo ulu Yesu aumfwile ifi, alyasukile Yailo, "Witina; cetekela fye, kabili akoundapwa." ⁵¹Ulo aishile ku ng'anda, tasuminishe nangu umo ukwingila nankwe, kanofye Petero na Yohane na Yakobo, na Wishi wa mwana na nyina. ⁵²Nomba bonse balikullosha no kupumapo misowa, lelo alilandile ati, "Lekeni ukulila; tafwile lelo asendeme fye utulo." ⁵³Lelo balitendeke ukumupumya, pantu baishibile ati alifwile. ⁵⁴Lelo alimwikete pa kuboko no kukuta, ukwebati, "We mwana, alamuka!" ⁵⁵Umupashi wakwe walibwelelemo, kabili apopenefye alimine. Alibebela ukumupela ifyakulya. ⁵⁶Abafyashi bakwe balipeshiwe amano, lelo alibaleseshe ukwebati beebako umuntu nangu umo pa fyacitikile.

9

¹Alikutile pamo abekumi na babili no kubapela amaka ne sambu ukufumya ingulu shonse no kuposha amalwele. ²Alibatumine ukuya mukushimikila ubufumu bwa kwa Lesa no kundapa abalwele. ³Alilandile kuli bena ati, "Mwipita kantu nangu kamo pa lwendo lwenu - nangu ni nkonto, nangu icikwama, nangu umukate, nangu indalama, ne mingila ya kucinja. ⁴Mu ng'anda yonse umo mwaingila, mwikale umo mwine ukufikafye nelyo mukafumako. ⁵Konse uko tabamipokelele, pa kufuma mu mushi ulya, mukunte no lukungu ukufuma ku makasa yenu kukuba ubunte kuli bena." ⁶Nolu balifumine kabili balile ukupita mu mushi, bakobila imbila nsuma na ukundapa monse. ⁷Nomba imfumu Herode yalyumfwile fyonse ifyalikucitika, kabili alipeshiwe amano, pantu balikulanda bamo abati Yohane alibukile ukufuma kubafwa, ⁸na bamo balikulanda ati Eliya alimonekele, na bambi nabo ati umo uwa muli bakasesesema ba kale alibukile. ⁹Herod alilandile ati, "Nine naputwile Yohane umutwe. Ninani uyu uo nkoumfwilapo ifi fintu?" Kabili alifwaile ukumumona. ¹⁰Ulo abatumwa babwelulwike, bali mulondolwelele fyonse ifyo bacitile. Nolu alibasendele, kabili balile mu bumfisolo ku mushi uwitwa Betsaida. ¹¹Lelo ulu ibumba lyaumfwile pali ifi, balimukonkele. Alibapokelele no kulanda kuli bena palwa bufumu bwa kwa Lesa, kabili aliposeshe abalikukabila ubundapishi. ¹²Nomba akasuba kali mukuwa, na bekumi na babili balishile kuli ena no kulanda ati, "Paseni ibumba ukwebati baye mu mishi ishingulwiwe na mumishi ya mu mbali mukufwaya umwakusendama ne filyo, pantu tuli mu ncende ya kutali." ¹³Lelo alilandile kuli bena ati, "Bapeleniko ifyakulya." Balilandile ati, "Tatukwete ificilile pa mikate isano ne sabi libili- kanofye tuye kushita ifyakulya fya bantu bonse aba." ¹⁴(Bali abantu nalimo amakana yasano.) Alilandile ku basambi bakwe ati, "Bebeni bekale mu mabumba ayali nalimo amakumi yasano cile bumba." ¹⁵Eco balicitile ifi, no kulenga abantu ukwikala panshi. ¹⁶Pakubula imikate isano ne sabi libili, aliloleshe ku mulu, alifpalile no kumokaula mutupimfya-tupimfya, no kupela kubasambi ukwebati bapele kwi bumba. ¹⁷Bonse balilile no kwikuta, ne fyashelepo fyalisendelele - imiseke ikumi na ibili iya mokaulwa mutupimfya. ¹⁸Calishile kuba ukwebati ulu Yesu ali akopepa umwine eka, abasambi bali nankwe. Alibepwishe, ukwebati, "Bushe ibumba lilanda ati nine nani?" ¹⁹Balyaswike ati, "Yohane kabatisha. Lelo bambi balanda ati Eliya, na bamo balanda ati umo uwa muli bakasesesema abapakale uwabuka." ²⁰Nolu alilandile kuli bena ati, "Lelo mwebo mutila nine nani?" Petero alyaswike ati, "Kristu wa kwa Lesa." ²¹Lelo alibasokele no kubalangilila ukutana eba ifi ku uli onse, ²²ukulanda ati, "Umwana wa muntu ali no kucula mu fintu ifingi no kukanwa kubakalamba na bashimapepo mukalamba na bakalamba, kabili bakamwipaya na pa bushiku bwakulenga shitatu akabushiwa." ²³Nolu alilandile kuli bena bonse ati, "Umfwa umo akofwaya ukwisa kuli nevo, afwile aikane umwine no kusenda icapindama cakwe cilabushiku no kunkonka. ²⁴Onse uyo uusungilila umweo wakwe akaulofya, lelo uulofya umweo wakwe pamulandu wandi akaupususha. ²⁵Bunonshi ndo buli ku muntu ukunonka isonde lyonse lelo alofya atemwe ukuiposa umwine?" ²⁶Uyo onse uwangumfwila insoni ne fyebo fyandi, muli ena Umwana wa Muntu akamumfwila insoni ulu akesa mu bukata bwakwe no bukata bwakwa Wishi no bwa ba malaika ba mushilo. ²⁷Lelo nkolanda kuli mwebo mucine nati, pali bamo abeminine pano abashakasonde imfwa ulu tabalati kumona ubufumu bwakwa Lesa." ²⁸Nomba nalimo inshiku cinekonse-konse panuma Yesu alandile ifi fyebo, alisendele Petero na Yohane na Yakobo no kunino lupili mu kupepa. ²⁹Ulo ali akopepa, icinso cakwe calicinjishe, ne fyakufwala fyakwe fyalyalukile ifyakubuta tutu. ³⁰Moneni, abaume babili bali kulanshanya nankwe, Mose na Eliya, ³¹abamonekele mubukata, ukulanshanya nankwe palwa kuya kwakwe, uko ali no kupwilishisha mu Yerusalemu. ³²Nomba Petero na abo abali nankwe balyumfwile utulo, lelo ulu babukile, balimwene ubukata bwakwe na baume babili abaminine nankwe. ³³Ulo bali kufuma kuli Yesu, Petero alilandile kuli ena ati, "Shikulu, cabune ifwebo ukuba kuno. Lekeni fwebo tukulepo insakwe shitatu, Imo yenu, imo yakwa Mose, naimbi iya Eliya." (Taishibile ifyo alikulanda.) ³⁴Ulo alikulanda ifi, ikumbi lyalishile nokwisa kubafimba, kabili balitininine nokwisa kwingila mwi kumbi. ³⁵Ishiwili lyalishile kufuma mwi kumbi, ukwebati, "Uyu Mwana wandi, uwasalwa; Mulekumumfwila." ³⁶Ulo ishiwili lyalandile, Yesu asangilwe ali eka. Balikele tondolo kabili tabaebeleko nangu umo muli shilya nshiku ifili fyonse pafyo bamwene. ³⁷Nomba ubushiku bwakonkelepo, ulu baishile kutentemuka ukufuma pa ulupili, ibumba ilikalamba lyali mukumenye. ³⁸Moneni, umuntu ukufuma mwi bumba alipundile, ukwebati, "Kasambilisha, namipapata ukwebati

mulolesheko pa mwana mwaume wandi, pantu emwana wandi umofye. ³⁹Moneni, umupashi ulamwingila kabili apopenefye alamba no kupunda; ulamulenga ukusamfula icakwebati alafumya ipofu kukanwa. Ulakokola ukumulekako no kumucenaula sana. ⁴⁰Nacipapata abasambi benu ukuutamfya, lelo tabacicita ico. ⁴¹Yesu alyaswike no kulanda ati, "Mwe nkulo iipondamishi kabili iyabula icicetekelo, nkaba nenu ukufika lilali no kushipikisha nenu? Leta umwana obe umwaume kuno." ⁴²Ulo umulumendo ali akuisa, ingulu yalimuposele panshi no kumushingulusha mu musamfu. Lelo Yesu alikalipile umupashi wakukowela no kundapa umulumendo, no kubwesha kuli wishi. ⁴³Nolu bonse balipapile pa bukulu bwakwa Lesa. Ulo bonse bali bakopapa pali fyonse ifyo alikucita, alilandile ku basambi bakwe ati, ⁴⁴"Leken i fi fyebo fishike mu matwi yenu: Umwana wa Muntu ali no kufutukwa mu maboko ya bantu." ⁴⁵Lelo tabailwike iyi milandile. Yalifishilwe kuli bena, eco tabaishibile ubupilibulo, lelo bali no mwenso wa ku mwipusha pali uku kulanda. ⁴⁶Nolu ifikansa fyalitampile pakati kabo pa ufwiile ukuba umukalamba. ⁴⁷Lelo Jesus pakwishiba imitontonkanishishe ya mu mitima yabo, alisendele akana akanono no kukabika pa lubali lwakwe ⁴⁸no kulanda kuli bena ati, Onse uwa pokelela akakaice mwi shina lyandi, apokelela nebo; na onse uwampokelela, apokelela uwa ntuma. Pantu onse uwa cepesha pali mwebo bonse emukalamba. ⁴⁹Yohane alyaswike ati, "Mwe Shikulu, twalimwene umo akotamfya ingulu mwi shina lyenu kabili twalimuleseshe, pantu takonka pamo na fwebo. ⁵⁰"Mwimulesha," efo Yesu alandile, "pantu onse uutakopinkana nenu ninishi ali nenu." ⁵¹Ulo inshiku shapaleme ishakusendwa kwakwe, aloseshe icinso cakwe ukuya ku Yerusalemu. ⁵²Alitumine inkombe ukumutangilila, kabili balile no kwingila mu mushi wa bena Samaria ukumupekanishisha fyonse. ⁵³Lelo abantu kulya tamupokelele pantu aliloshe icinso cakwe ukuya ku Yerusalemu. ⁵⁴Ulo abasambi Yakobo na Yohane bamwene ifi, balilandile ati, "Shikulu, bushe mukofwaya twite umulilo ukufuma ku mulu ukwisa kubonaula?" ⁵⁵Lelo alipilibwike no kubakalipila, ⁵⁶kabili balile ku mushi umbi. ⁵⁷Ulo bali bakoya mu musebo, umo alilandile kuli ena ati, "Nkomikonka konse uko mukoya." ⁵⁸Yesu alilandile kuli ena ati, "Ba mumbwe balikwata ifilindi, ne fyon i fya mulwelele fyalikwata ifinsa, lelo Umwana wa Muntu takwata na pakusamika umutwe wakwe." ⁵⁹Nolu alilandile kuli umbi ati, "Nkonka." Lelo alilandile ati, "Mwe Shikulu, pakubala lekeni ndeya kushika batata." ⁶⁰Lelo alimwebele ati, "Leka abafwa bashike abakufwa babo. Lelo webo, kabiye no kubilikisha ukutali no kusabankanya konse ubufumu bwakwa Lesa." ⁶¹Nolu umbi alilandile ati, "Nkomikonka, mwe Shikulu, lelo pakubala lekeni nkashalikepo abang'anda yandi." ⁶²Yesu alimwaswike ati, "Takwaba uwikata ukuboko kwakwe ku cakuliminako no kulolesha kunuma uwalingila ubufumu bwakwa Lesa."

10

¹Nomba panuma ya ifi fintu, Shikulu alisontelepo na bambi, amakumi cinelubali, no kubatuma babili-babili ukuya ukumutangilila muli cila mushi ne ncende uko umwune ali nokuya. ²Alilandile kuli bena ati, "Ubusomboshi buli fulile, lelo ababomfi balicepele. Eco ipusheni Shikulu wa busomboshi atume ababomfi mu busomboshi bwakwe. ³Kabiyeni mu nshila yenu. Moneni, Nkomituma kubati ni mpanga pakati ka mimbulu. ⁴Tekweshi kusenda chola ca ndalama, nangu cola capabulendo, nangu indyatu, kabili mwiposha nangu umo munshila. ⁵Yonse ng'anda mwaingilamo, pakubala mulekulanda ati, 'Umutende ube pa ng'anda ino!' ⁶Umfwa umwana wa mutende epo ali, umutende wenu ukaba pali ena, lelo umfwa talipo, uka mibwelela. ⁷Mukekalilile mu ng'anda imo ine, mulekulya no kunwa conse ico bakomipela, pantu umubomfi yalimulingile amalipilo. Tekweshi kulaenda cila ng'anda ne ng'anda. ⁸Umushi onse mwayamo, kabili bamipokelela, mulekulya ico bamipekanishisha ⁹kabili mulekundapa abalwele ababamo. Mulekulanda kuli bena ati, 'Ubufumu bwakwa Lesa bulipaleme kuli webo.' ¹⁰Ulo mwaingila mu mushi kabili bakana ukumipokelela, kabiyeni mu misebo ya uko no kulanda ati, ¹¹Nolukungu lwine ulukofuma mu mushi wenu ulwali kulambata ku makasa yesu tukomikuntila! Lelo ishieni ici: Ubufumu bwakwa Lesa bulipaleme.' ¹²Nkolanda kuli mwebo nati pali bulya bushiku nkalekelelapo Sodoma ukucila ulya mushi. ¹³Akalanda kuli webo, Korasini! Akalanda kuli webo, Betisaida! Imilimo ya maka iya citilwe muli webo umfwa yalicitilwe kuli Turi na Sidoni, nga balilapile kale, ukwikala mu fisamu na mu mitoi. ¹⁴Lelo nkanashako ubukali pali Turi na Sidoni pa bupingushi ukucila pali webo. ¹⁵Webo, Kapernaum, bushe utontokanya ukwebati ukasumbulwa ku mulu? Awe, webo uli nokubikwa panshi ku mbo. ¹⁶Uyo ukutika kuli webo akutika kuli nebo, kabili na onse ukukana akana nebo, kabili uyo uwa nkana akana no wantuma. ¹⁷Abekumi cinelubali balibwelulwike ne nsansa, bakolanda ati, "Shikulu, ne ngulu shine shalikutubela mwishina lyenu." ¹⁸Yesu alilandile kuli bena ati, "Nalikumona uko Shetani akopona ukufuma ku mulu kubati ni nkuba. ¹⁹Moneni, Ndimipele insambu sha kunyanta pa nsoka na bakaling'ongo, na pa maka yonse aya mulwani, kabili takuli icili conse icikamicena munshila iili yonse. ²⁰Nangula cingabe ifyo mwisangalala palwa ici ceka, ukwebati impashi ikominakila, lelo sangalaleni ukucilapo ukwebati amashina yenu yalilembwa mu mulu." ²¹Panshita ilya ine alisangalele sana mu Mupashi wa Mushilo no kulanda ati, "Nkomilumbanya, mwe Tata, Shikulu wa mulu ne sonde, pantu mwebo mwilifishile ifi fintu kuba mano na kubabwishibilo no kufisokolola ku batasambilila, kubati bana abanono. Ee, Tata, pantu ico cali icakutemuna ku menso yobe. ²²"Ifintu fyonse fyalipelwa kuli nebo ukufuma kuli Tata, kabili takwaba nangu umo uwaishiba Umwana kanofye Tata, takwaba nangu umo uwaishiba Tata kanofye Umwana na kubo Umwana asala ukusokolwela." ²³Nomba alipilibukile ku basambi no kulanda nabo munkama ati, "Balipalwa abo abamona ifintu ifyo mumona. ²⁴Nkolanda kuli mwebo nati, abengi bakasesema na bashamfumu balikukabila ukumona ifintu mumona, kabili tabafimwene, no kumfwa ifintu ifyo mumfwa, lelo tabafyumfwile." ²⁵Moneni, uwaishibisha malango aliminine pakwebati amweshe, ukulanda ati, "Kasambilisha, kuti nacita shani pakupyana umweo wa muyayaya?" ²⁶Yesu alilandile kuli ena ati, "Findo fyalembwa mu malango? Webo ubelenga shani?" ²⁷Alipele ubwasuko no kulanda ati, "Ulekutemwa Shikulu Lesa obe no mutima obe onse,

no mweo obe onse, na maka yobe yonse, na mano yobe yonse, na umwina mupalamano obe kubati ni we mwine." ²⁸Yesu Alilandile kuli ena ati, "Walungika mukwasuka. Ulekucita ici, kabili webho uli no kuba no mweo." ²⁹Lelo ena, mukufwaisha ukuipokola umwine, alilandile kuli Yesu ati, "Ninani umwina mupalamano wandi?" ³⁰Yesu alimwaswike no kulanda ati, "Kwaliko umwaume umo uwalikutentemuka ukufuma ku Yerusalemu ukuya ku Yeriko. Alisanshilwe ku bapupu, balimupokolwele ifyuma fyakwe, no kumuma, no kumusha alifwile icitu." ³¹Ku ceshuko shimapepo umo alikuya akotentemukila muli ilya ine inshila, kabili ulu amumwene, alipitile lubali lumbi. ³²Mu musango umo wine, umwina Lebi nao, ulu aishile pa ncende no ku mumona, alipitile lubali lumbi. ³³Lelo umwina Samaria umo, ulu ali pabulendo, aliishile apo ali. Ulu amumwene, aliketwe nkumbu. ³⁴Alipalamine pali ena no kumukakila ifilonda fyakwe, alipongolwelelepo amafuta no mwangashi. Ali mubikile na panama yakwe, no kumutwala mu ng'anda ya beni, no kumutensha. ³⁵Ubushiku bwakonkelepo ali bulile indalama shibili, no kupela ku mwine wa ng'anda ya beni, no kulanda ati, 'Mu musunge bwino, ne shikapulamo shonse isho mukabomfya, ulu nkabweluluka, nkesa kukulipila.' ³⁶Nani pali aba batatu uo ukotontokanya uwali umwina mupalamano ku waponene mu bapupu?" ³⁷Alilandile ati, "Uyo uwamulangile uluse." Yesu alilandile kuli ena ati, "Kabiye kabili ulekucita cimo cine." ³⁸Nomba ulu bali bakoenda, aliingile mu mushi umo, no mwanakashi umo uweshina lya Marita alimupokelele mu ng'anda yakwe. ³⁹Alikwete nkashi yakwe uwe shina lya Maria, uwaikele pa nkasa shakwa Shikulu no kunfwa ku cebo cakwe. ⁴⁰Lelo Marita ali kupikintika mukupekanya icakulya. Alishile kuli Yesu no kulanda ati, "mwe Shikulu, tamusakamene ukwebati nkashi yandi alinshile neka mukupekanya? Eco mwebeni angafweko." ⁴¹Lelo Shikulu alyaswike no ukulanda kuli ena ukwebati, "Marita, Marita, webho nausakamikwa no kushupikwa mu fintu ifingi, ⁴²lelo icintu cimo fye ecilingile. Maria alisalile ica bune, ico icitakapololwe kuli ena."

11

¹Calicitikile ubushiku bumo ukwebati Yesu alikupepa pa ncende imo. Ulu apwishishe, umo pa basambi bakwe alilandile kuli ena ati, "mwe Shikulu, tusambilisheni ifya kupepa ngefyo Yohane asambilishe abasambi bakwe." ²Yesu alilandile kuli bena ati, "Ulu mukopepa mulekulanda ati, 'Tata, ishina lyenu lilekucindamikwe nge lya mushilo. Ubufuma bwenu bwise. ³Tupelemi icakulya ica cila bushiku. ⁴Tubeleleni uluse ku membu shesu, ifyo twelela abatukwatila imisha. Mwitutwala mu matunko.'" ⁵Yesu alilandile kuli bena ati, "Nani pali mwebho uwingaba no munankwe, no kuya kuli ena pakati ka bushiku, no kulanda kuli ena ati, 'Cibusa, ngashimako imikate itatu, ⁶pantu umunandi elo afikafye pabulendo bwakwe, kabili nshikwetepo nangu kamo akakumupa?' ⁷Elo uuli mukati uwa mwaswike kuti alanda ati, "Wimpamfya webho. Icibi ciliselwe kale na bana bandi, pamo nandibo, tuli mu busanshi. Tekuti njime no kukupela umukate." ⁸Ndelanda kuli mwebho nati, nangufye tabukile no nokwisa kukupela umukate pantu uli munankwe, lelo pamulandu wa mupatikisha obe akema no kwisa kukupela imikate ukulingana neyo ukofwaya. ⁹Nkolanda kuli mwebho nati, lombi, kabili cikopelwa kuli webho; fwaya, kabili ukosanga; konkosha, kabili cikoiswilwa kuli webho. ¹⁰Pantu umuntu onse uulomba alapokelele; no muntu uufwaya alasanga; na ku muntu ukonkosha, cikeswilwa. ¹¹Ni wishi ndo pali mwebho, umfwa umwana obe aisa kukulomba isabi, enga mupela insoka mucifulo ce sabi? ¹²Nangu nga aisa kulomba ilini, bushe kuti waisa kumupela kaling'ongo? ¹³Eco, apo mwebho mwebha bubi mwilishiba ukupela ifyabupe fyabune ku bana benu, pali bufi Shinwe uwa ku mulu takacishepo ukupela Mupashi wa Mushilo kuli abo abako mulomba?" ¹⁴Nomba Yesu alikutamfya ingulu iya bucibulu. Ulu ingulu yaisa kufuma, umwaume uwali cibulu alilandile, ne bumba lyalisungwike. ¹⁵Lelo abantu bamo balilandile abati, "Nikumaka yakwa Beelesebu, kateka wa ngulu, eko akotamfisha ingulu." ¹⁶Bambi bali kumweshi no kufwaya kuli ena icishibilo ica kufuma ku mulu. ¹⁷Lelo Yesu alishibe amatontontokanya yabo kabili alilandile kuli bena ati, "Ubufumu bonse ubwapatukana ubwine bukashala icibolya, ne ng'anda ya patukana iine yeka ilawa. ¹⁸Nga cakwebati Shetani apatukana umwine, bushe ubufumu bwakwe kuti bwaiminina shani? Pantu mukolanda ati nkokumisha ingulu mwishina lyakwa Beelesebu. ¹⁹Nga cakwebati nkokumisha ingulu mu maka yakwa Beelesebu, Ni muli nani abamikonka batamfisha ingulu? Pamulandu wa ici, bakaba ba kapingula benu. ²⁰Lelo nga cakwebati ntamfisha ingulu ku kuboko kwa kwa Lesa, ninshi ubufumu bwa kwa Lesa bulishile kuli mwebho. ²¹Ulu mwaume wa maka uwaipangasha umupwilapo abaka ing'anda yakwe, ninshi ifikwatwa fyakwe filicingililwe, ²²lelo ulu umwaume wa kumucila maka amucimfya, umwaume wa maka ukumucila akosenda icanso ico umwaume ashintililemo no kutapa ifikwatwa fya mwaume. ²³Uyo uushili nanebo akopinkana na nebo, na uyo uushikolonganika nanebo alasalanganya. ²⁴Ulu mupashi wakukowela wafuma mu muntu, ulaya ukosabanta muncende ishakuma no kufwaya ukutusha. Ukwabula ukusanga nangu imo, waisa kulanda ati, 'Nkobwelela ku ng'anda yandi uko na fumine.' ²⁵Pakwisa kubwela, waisa kusanga ati, ing'anda ilipyangilwe ubusaka no kuteyanishiwa. ²⁶Nolu ulaya no kuya kusenda imipashi iyakukowela cinelubali iya kubipisha ukucila wena kabili yonse yaisa kwikala mulya. Ne mibele ya kupelekesha iyaa ulaya muntu ilabipisha ukucila iyapakubala." ²⁷Calicitikile ukwebati, ulu alandile ifi fintu, namayo umo alisanswile ishiwi mwibumba nokwisa kulanda kuli ena ati, "Lyakupalwa ifumo ilya kufyele na mabele ayali kukonsha." ²⁸Lelo alilandile ati, "Abakupalwa nyabo abomfwa icebo cakwa Lesa no ku cibaka." ²⁹Ulu amabumba yali kufulilako, Yesu alitendekele ukulanda ati, "Iyi nkulo ni nkulo ya bubi. Ikofwaya icishibilo, nangula takuli icishibilo icikapelwa kuli yena kanofye icishibilo cakwa Yona. ³⁰Pantu ngefyo Yona aishile kuba icishibilo ku bena Ninebe, efyo no Mwana wa Muntu akesa kuba icishibilo kuli iyi nkulo. ³¹Namfumu wa ku kapinda ka kukulyo akema pa bupingushi pamo na baume ba iyi nkulo no kubaseka, pantu alishile ukufuma kumpela ye sonde ukwisa kumfwa amano yakwa Solomoni, kabili moneni, uwakucila Solomoni ali pano. ³²Abena Ninebe bakeminina pa bupingushi pamo na iyi nkulo ya bantu kabili bakaiseka, pantu balilapile ku bushimikilo bwakwa Yona, kabili moneni, uwakucila Yona ali pano. ³³Takuli nangu umo, panuma ya kwasha inyali, uwisa kuibika pa ncende yakufisama nangu ukuifimbapo

museke, lelo nipacakutekapo inyali, pakwebati bonse abakoingila benga mona ulubuto.³⁴ Ilinso enyali ya mubili obe. Ilinso lyobe nga lya bune, ninshi no mubili onse ukesulamo ulubuto. Lelo ilinso lyobe nga lya bubi, umubili obe onse waisulamo imfimi.³⁵ Eco, mube abakucenjela ukwebati ulubuto ululi muli mwebo te mfimi.³⁶ Eco kanshi umubili obe onse uliswilemo lubuto, ukukana kwata icilundwa icili conse mu mfifi, ninshi umubili obe onse ukesa kuba nge nyali iikosanikila ulubuto pali webo.³⁷ Ulo aisakuleka ukulanda, umuFarise amulalika ukuya kulya nankwe ku ng'anda yakwe, eco Yesu alile no kuya kukuwama.³⁸ UmuFarise alisungukile pa kwebati Yesu tabalile kusamba ulo tabalalya.³⁹ Lelo Shikulu alilandile kuli ena ati, "Nomba kanshi, mwebo mwe baFarise muwamya kunse ya nkombo ne misambilo, lelo mukati kenu mwaisula ubupupu no bubi.⁴⁰ Mwe bantu bakubula mano! Bushe uwalengele kunse tali eulenga na mukati?"⁴¹ Peleni icili mukati nge cankumbu, kabili elo fyonse fikesa kuba ifyakusanguluka kuli mwebo.⁴² Lelo akalanda kuli mwebo mwe baFarise, ico ica pe kumi ca minti na rue no musalu umbi uwa mwibala, mufumyapo ku kutula, lelo mulekelesha umulinganya no kutemwa kwakwa Lesa. Ciliyene ukucita ubulungami no kutemwa Lesa, ukwabula ukufilwa ukucita ifintu na fimbi.⁴³ Kalanda kuli mwebo mwe baFarise, pantu mwatemwa ifipuna fya kuntanshi mu ma synagoge no kumiposha kwa mucinshi mufisankano.⁴⁴ Kalanda kuli mwebo, pantu mwaba kubati ni nshishi ishakubula icishibilo apo abantu benda ukwabulo kushishiba.⁴⁵ Umo uwaishibisha malango alilandile kuli ena ati, "Kasambilisha, ico ukolanda ukotutuka na fwebo."⁴⁶ Yesu alilandile ati, "Akalanda kuli mwebo, ba kasambilisha wa malango! Pantu mubika ifisendo pa bantu ifyakukosa ukusenda, lelo tamwikate fisendo nangu ni ku munwe wenu umo.⁴⁷ Akalanda kuli mwebo, pantu mukulila ba kasesema inshishi, kabili fikolwe fyenu efya bepeye.⁴⁸ Eco muli ba kambone kabili mulasuminisha ku milimo ya fikolwe fyenu, pantu mucine bali bepeye kabili mulakula inshishi shabo.⁴⁹ Pali uyu mulandu nao, amano yakwa Lesa yalilandile ati, 'Nkatuma kuli bena ba kasesema na ba tumwa, kabili bakapakasa no kwipayapo bamo.'⁵⁰ Pamulandu wa ici, iyi nkulo ikesa kuba iya mulandu pa mulopa onse uwaba kasesema uwasuma ukutulafye pa mufula wa calo,⁵¹ ukufuma pa mulopa wakwa Abele ukufika pa mulopa wakwa Sekaria, uo baipaile pakati ka cipailo ne tempele. Eee, Nkolanda kuli mwebo nati, iyi nkulo ikaba no mulandu.⁵² Akalanda kuli mwebo mwe baishibisha amalango, pantu mwalisenda imfungulo ya kwishiba; tamwingilamo mwebene, kabili mucilikisha abo abakoingila."⁵³ Panuma Yesu aisa kufumako kulya, bakalemba na baFarise balipinkene no kutalikana nankwe pa fintu ifingi,⁵⁴ balikele mukulolela ukumwikatila pa cebo ico engalanda.

12

¹Pali nomba, ulo iminta pendwa ya bantu bakolongene pamo ica kwebati bakonyantana umo no mu nankwe, pakubala alitendeke ukulanda ku basambi bakwe, "Cenjeleni ne citutumushi ca baFarise, icili ni bububi munda."² Lelo takwaba icafimbwapo icishakasokololwe, ne cafiswa icishakeshibikwe.³ Eco fyonse ifyo mwali kulandila mu mfimi fikesa kumfwinkila mu lubuto, neco mwalandile mu kutwi mu miputule ya mukati fikabilikishiwa pa mitenge ya mayanda.⁴ Nkolanda kuli mwebo nati, ba cibusa wandi, mwile kutina abepaya umubili, na panuma ya ifyo tabakwete neco bengacita cimbi.⁵ Lelo nkomisoka mwebo uo mwingatina. Mulekutina uyo, panuma ya kwipaya, ali kwete nsambu ya kumiposa kumbo. Eee, nkolanda kuli mwebo nati, eo mulekutina.⁶ Bushe inseba shisano tashishitwa mutuma kobili tubili? Lelo takwaba nangu imo ilabwa mu menso yakwa Lesa.⁷ Lelo ne mishishi ya kumitwe yenu yalipendwa. Mwilekutina. Muli bakucindamisha ukucila inseba ishing.⁸ Nkolanda kuli mwebo nati, onse uunumbula pa menso ya bantu, Umwana wa Muntu nao akamulumbula pa menso yaba malaika bakwa Lesa,⁹ lelo uyo uunkana pa menso ya bantu nkamukana pa menso yaba malaika bakwa Lesa.¹⁰ Na onse uulanda icebo cabubi pa Mwana wa Muntu, akabelelwa uluse, lelo kuli uyo uupontela Mupashi wa Mushilo, takabelelwe uluse.¹¹ Ulo bakamitwala mu ma synagoge, kuli ba kateka, na ba maka, mwikasakamana pafyo mukalekulanda mukuipokolola, nangu ifyo mukalanda,¹² pantu Mupashi wa Mushilo akamisambilisha mukashita kalya ifyo mufwile ukulanda.¹³ Elo umo uwa mwibumba alandile kuli ena ati, "Kasambilisha, ebeni munyinane ukwakanya icananiko cabupyani na nebo."¹⁴ Yesu alilandile kuli ena ati, "We muntu, ninani wansontele ukuba kapingula nangu ndubulwila pali mwebo?"¹⁵ Alilandile kuli bena ati, "Cenjeleni ukwebati muisunge ku fyakukabila fya lunkumbwa lonse, pantu umweo wa muntu tawaba mu bwingi bwa fintu akwata."¹⁶ Nolu Yesu alibelele umulumbe, ukwebati, "Ibala lya mukankala lyali twalishe,¹⁷ kabili alitontonkenye mu mutima wakwe, ukwebati, 'Nkocita shani, pantu nshikwete ncende umwakututila ifisabo fyandi?'"¹⁸ Alilandile ati, 'Ifi efyo nkocita. Nkobongolola amatala no kukulapo ayakalamba, emo nkasungila ifisabo fyandi fyonse ne fipe fyandi fimbi.¹⁹ Nkolanda ku mweo wandi, "We mweo, ulikwete fipe ifingi ifikasungwa pa myaka iingi. Utushe, ulekulya, ulekunwa, ulekusangalala."²⁰ Lelo Lesa alilandile kuli ena ati, "We ciwelewele ca muntu, buno bushiku umweo obe ukopokololwa kuli webo, ne fintu wapekanya, fikaba fyakwa nani?"²¹ Efyaba uukotutila ifyuma fyakwe umwine kabili taba umukankala kuli Lesa."²² Yesu alilandile kuba sambu bakwe ati, "Eco nalanda kuli mwebo nati, mwilekusakamana pa bwikashi bwenu, ifyo mukalya; nangu imibili yenu, ifyo mukafwala."²³ Pantu umweo walicila ifyakulya, no mubili walicila ifya kufwala.²⁴ Tontonkanyeni pali ba mwankole, ukwebati tabalima nangu ukusepa, tabakwata cipao nangu butala, lelo Lesa alabalisha. Mwalicindamisha ukucila ifyoni!²⁵ Ninani pali mwebo mukuba uwakusakamana engalundapo akalitoni kamo ku nshiku sha bumi bwakwe?²⁶ Nga cakwebati mwafilwa ukucita aka kantu kaku cepesha, nindo musakamanina pa fyashala?²⁷ Tontonkanyeni pali bacananika - ifyo bakula. Tababomba, nangu kupikula ifyakufwala. Lelo nkomyeba nati, nangu Solomoni mubukata bwakwe talikufwala nga umo uwa muli bena.²⁸ Nga Lesa kuti afwika icani ca mu mpanga, icilipo lelo, kabili mailo caposwa mwi buku lya mulilo, bushe tekuti acilepo ukufwika mwebo, mwebo mweba cicetekelo cinono!²⁹ Mwilekufwaya ifyo mukalya nefyo mukanwa, kabili mwilekusakamana.³⁰ Pantu inko shonse isha pa calo bafwaya ifi fintu, na Shinwe

alishiba ati mukofikabila.³¹ Lelo mufwaye ubufumu bwakwe, nefi fintu fikalundwa kuli mwebo.³² Mwilekutina, mwe mukuni uwa cepesha, ico Shinwe abekelwa ukumipela ubufumu.³³ Shitisheni ifikwatwa fyenu no kupela ifya nkumbu. Icitileni mwebene ifikwama ifitakakote - icuma mu mulu icitapwa, umo umupupu tafika, no bubenshi tabonaula.³⁴ Pantu ukuli icuma cobe, eko no mutima obe nao ukaba.³⁵ Imisana yenu ibe iya kukakwa ne nyali shenu ishakwaka, kabili mube nga bantu abakololela shikulu wabo ulo akabwela ku mutebeto wa bwinga, pakwebati ulo aisa kukonkonsha, benga mwiswilako iciibi bwangu.³⁷ Balipalwa ababomfi balya abo shikulu wabo akasanga bakolola ulo akesa. Mucinefye nkolanda kuli mwebo nati, akaikaka umwine kukupyunga no ku bekalika kwi tebulo, kabili akesa kubapyungila.³⁸ Nga shikulu abwela munshita ya cibili mu kulinda kwa bushiku, nangu munshita ya citatu no kubasanga abaiteyanya, balipalwa ababomfi abo.³⁹ Lelo mwishibe ici, ukwebati shikulu wa ng'anda nga alishibile akashita umupupu akoisa, nga talekele ing'anda yakwe ukusanswa.⁴⁰ Mube abaiteyanya, pantu Umwana wa Muntu akoisa panshita iyo tamwenekela.⁴¹ Petero alilandile ati, "mwe Shikulu, bushe mukolandafye uyu mulumbe kuli fwebofye, nangu nakuli bonse?"⁴² Shikulu alilandile ati, "Ninani kanshi uwacishinka kabili kangalila wa mano uo shikulu akabika mukumona pa babomfi bambi ukupela ifyakaniko fya fyakulya panshita iya kulinga?"⁴³ Alipalwa uyo mubomfi uo shikulu wakwe akasanga alecita ifyo ulo akabwela.⁴⁴ Mucinefye nkolanda kuli mwebo ukwebati akamubika pafipe fyakwe fyonse.⁴⁵ Lelo umfwa ulya mubomfi alanda mu mutima wakwe ati, 'Shikulu wandi akokola ukubwela,' kabili atendeka ukuma ababomfi abaume na banakashi no kulya no kunwa no kukolwa,⁴⁶ shikulu wa ulya mubomfi akesa mu bushiku ashenekele na mukashita ashishibile kabili akamuputaula mutupimfya no ku musontela icifulo pamo naba shaba na cine.⁴⁷ Ulya mubomfi, pakwishiba ukufwaya kwakwa shikulu wakwe na pakukana ipekanya nangu ukucita ukulingana no kufwaya kwakwe, akapumaulwa ne fipumo ifingi.⁴⁸ Lelo uyo uushaishibile nokucita ifyawamine mpumo, akapumwa panono. Lelo abo bonse abapelwe ifingi, ifingi fikafwaikwa kuli bena, noyo uo balashilile fingi, bakepushako ifyakucilapo.⁴⁹ Naishile mukuposo mulilo pe sonde, kanshi nga wali bilimwike kale.⁵⁰ Lelo ndi no lubatisho ulo ndi no kubatishiwako, kabili ifyo nkolungulushiwa mpaka lukapwililike!⁵¹ Bushe mukotontonkanya ukwebati naishile mukuleta umutende pe sonde? Iyoo, nkomyeba nati, lelo kano ukupatukana.⁵² Pantu ukufuma pali nomba kukaba basano mu ng'anda imo abakupatukana - abantu batatu bakapusana naba bili, na bantu balili bakapusana na batatu.⁵³ Bakapatukanamo, wishi bakapusana no mwana mwaume, no mwana mwaume bakapusana na wishi, nyina bakapusana no mwana mwanakashi no mwana mwanakashi bapusana na nyina, nafyala bakapusana no mulokashi umwanakashi no mulokashi umwanakashi bakapusana na nafyala.⁵⁴ Yesu alikulanda ku mabumba nako ati, "Ulo mwamone kumbi likonina ku masamba, Apopenefye mukalande amuti, 'Imfula ikoisa, nefyo efikacitika.'⁵⁵ Ulo umwela wa kukapinda ka kukulyo ukopupa, mukalande amuti, 'Kukoba icikabilila icikalamba, kabili fycitika.'⁵⁶ Mwe babubi munda, mwalishiba ukupilibula kwa mimonekele ye sonde ne myulu, lelo nindo mushaishibila ukwilula ifya nshita ino?"⁵⁷ Nindo mutaipingwila icilungeme palwenu mwebene?⁵⁸ Pantu ulo mukoya no mulwani obe kuli kapingula, munshila weshe ukumfwana nankwe pakwebati takutwele kuli kapingula, na pakwebati kapingula takupele ku mushilika, no mushilika takuposele mu cifungo.⁵⁹ Nkolanda kuli webi nati, tawakafumemo mulya mpaka ukalipile akamyampuku ka ndalama akakupelekesako."

13

¹Pali ilya nshita, abantu bamo kulya bali mwebele palwa bena Galili abo umulopa wabo Pilato asankenye na malambo yabo.² Yesu alibasukile no kulanda kuli bena ati, "Bushe mukotontonkanya ukwebati aba abena Galili babembu sana ukucila bonse abena Galili bambi pantu bali culile muli iyi nshila?"³ Iyoo, efyo namyeba. Lelo umfwa tamulapile, mwebo bonse mukonaulwa mu musango umo ine.⁴ Nangu balya ikumi limo na cinekonse - konse abantu ba mu Siloamu abo ulupungu lwawilile no kubepaya, bushe mukotontonkanya ukwebati bali babembu sana ukucila abantu bambi mu Yerusalemu?⁵ Iyoo, Nalanda. Lelo umfwa mwebo tamulapile, naimwe bene bonse mukonaika.⁶ Yesu alibelele uyu mulumbe, "Umo alikwete icimuti ca mikunyu icabyelwe mwibala lyakwe ilya myangashi kabili alishile no kufwayako icisabo lelo tasangileko nangu cimo.⁷ Umuntu alilandile ku mulimi ati, 'Lolesha, pa myaka itatu ndesa no kwesha ukufwayako icisabo kuli ici cimuti ca mukunyu kabili nshisangako nangu cimo. Citeme. Nindo ukocilekela cilekonaula umushili?"⁸ Umulimi alyasukile no kulanda ati, ' Shikulu, cilekeni uno mwaka ulo nkocimbilila mumbali no kubikamo umufundo.⁹ Umfwa cikatwala ifisabo uyu mwaka, cabune; lelo umfwa tacitwele, citemeni!"¹⁰ Nomba Yesu alikusambilisha mwi synagoge limo pe Sabata.¹¹ Moneni, umwanakashi uo pa myaka ikumi na cinekonse-konse uwakwete umupashi wa kunasha umubili ali palya. Alikonteme kabili takwete maka ya kololoka ukufikapo.¹² Ulo Yesu amumwene, alimukutile no kulanda ati, "We mwanakashi, wakakulwa ku bunasha bobee."¹³ Alibikile amaboko yakwe pali ena, napopenefye alyololweke no kupela ubukata kuli Lesa.¹⁴ Lelo kangalila wa mu synagoge alifulilwe pantu Yesu aposha pe Sabata. Eco kangalila alyaswike no kulanda kwi bumba ati, "Kwaliba inshiku mutanda ishalinga ukubombamo. Iseni no kundapwa, te pa bushiku bwe Sabata."¹⁵ Shikulu alimwaswike no kulanda ati, "Mwe babubi munda! Bushe mwebo bonse tamukakwila ing'ombe na punda wakwe ukufuma mwi tyanga no kufitungulula mu kunwa pe Sabata?"¹⁶ Eco na uyu umwana mwanakashi wa kwa Abrahamu, uo Shetani akakile pa myaka iingi iili ikumi na cinekonse - konse, bushe ifikakilo fyakwe tekuti fikakulwe pa bushiku bwe Sabata?"¹⁷ Ulo alandile ifi fintu, bonse abali kumutalika balyumfwile nsoni, lelo ibumba lyonse ifikatami ifyo acitile.¹⁸ Nolu Yesu alilandile ati, "Bushe ubufumu bwakwa Lesa bwaba shani, kabili findo ninga bupalanyako?"¹⁹ Bwaba kubati luseke lwa lubanga ulo umuntu abulile no kuposa mwibala lyakwe, kabili lwalikulile mu cimuti icikalamba, ne fyonni fya mu mulu fyakulamo ifinsa mu misambo ya ciko.²⁰ Nakabili alilandile ati, "Ni kufindo ninga palanya ubufumu bwakwa Lesa?"²¹ Bwaba kubati citutumushi ico umwanakashi abula no

kusankanya ne fipimo fitatu ifya bunga bwa ng'ano mpaka ubunga bwa ng'ano bonse bwa tutumuka.¹²² Nolu Yesu alyendele ukupita mu misumba na mu mishi, akosambilisha no kuipangila inshila ukulalo ku Yerusalemu.²³ Umo alilandile kuli ena ati, "Mwe Shikulu, Bushe banono fye abantu abakapusuka?" Eco alilandile kuli bena ati,²⁴ "Lwisheni ukwingila pa mwinshi wa kamfyemfye, pantu, Ndemyebe nati, abengi bakesha ukwingila, lelo tabakakwanishe ukwingila."²⁵ Ulo fye umwine wa ng'anda aima no kukoma ku ciibi, ninshi ukoiminina panse no kukonkonsha ku ciibi no kwebati, 'Mwe Shikulu, mwe Shikulu, lekeni twingile.' "Akasuka no kulanda kuli webo ati, 'Nshikwishibile nangu kuntu ufumine.'²⁶ Nolu ukalanda ati, 'Twalilile no kunwa ku ntanshi yenu no kusambilisha mu misebo yesu.'²⁷ "Lelo akasuka ati, 'Nalanda kuli mwebo nati, Nshishibe kuntu mufumine. Fumeni kuli nevo, mwebo bonse mwe babomfi batalungama!'"²⁸ Kukaba ukulila no kusumanya ameno ulo mukamona Abrahamu, Isaki, Yakobo, na bakasesema bonse mubufumu bwakwa Lesa, lelo mukaposwa kunse.²⁹ Bakesa ukufuma ku kabanga, ku masamba, kukuso na kukulyo, no kwikala kwi tebulo mu bufumu bwakwa Lesa.³⁰ Ishibeni ifi, abo abacepesha ebakaba abantanshi, nabo abacindamisha bakaba abanuma."³¹ Mu nshita ilya ine, Bamo abaFarise balishile no kulanda kyuli ena ati, "Kabiyeni no kufuma kuno pantu Herode akofwaya ukumipaya."³² Yesu alilandile ati, "Kabiyeni no kuya kweba ulya mumbwe ati, 'Lolesha, Ndetamfya ingulu no kundapa ilelo na mailo, no bushiku bwakulenga shitatu nkafika pa buyo bwenu.'³³ Nangu cibe ifyo, cililingile nevo ukukonkanyapo ilelo, mailo, no bushiku bwakonkapo, apo tacasuminishiwa kasesema ukonawilwa kunse ya Yerusalemu.³⁴ Yerusalemu, Yerusalemu, uwipaya ba kasesema no pola amabwe abo abatumba kuli webo. Ifyo ilingi nafwaishe ukukolonganya abana bobo nga filya nankoko afukatila utwana twakwe mu mapindo yakwe, lelo webo tawali kufwaya ifi.³⁵ Mona, ing'anda yobe yalekeleshiwa. Nakweba nati, tawakambonepo mpakafye ukalanda ati, 'Alipalwa uwishila mwi shina lyakwa Shikulu.'"

14

¹Calicitikile pe Sabata limo, ulo aile kwingila mu ng'anda ya ntungulushi imo iya baFarise ku kulya umukate, ukwebati bali ku mulolekesha.² Moneni, pa ntanshi yakwe palipo umuntu uwali kulwala ubulwele bwa kufimba amaboko na molu.³ Yesu alipwishi abaishibisha malango ya ba Yuda na baFarise ati, "Bushe calisuminishiwa ukundapa pe Sabata, nangu iyo?"⁴ Lelo bali kutumene fye. Eco Yesu alimwikete, alimundepe, kabili ali mulekele alekuya.⁵ Alilandile kuli bena ati, "Ninani pali mwebo uukwete umwana umwaume nangula ing'ombe iya ponena mu cishima pa bushiku bwe Sabata ashinga yabule palya penefye?"⁶ Balifililwe ukumupela ubwasuko pali ifi fintu.⁷ Ulo Yesu amwene ifyo abo abalalikwe basalilepo ipipuna fya bucindami, alibelele umulumbe, ukulanda kuli bena ati,⁸ "Ulo walalikwa kuli umo ku mutebeto wa bwinga, wilekwikala ku ncende ya kucindama, pantu kuti na umbi alilalikwe uwa kucindamisha ukucila pali webo." Ulo umuntu wa milalike mwebo bonse babili afika, ali no kulanda kuli webo ati, 'Pela uyu muntu umbi ncende yobe,' Elo mu nsoni ukaya kubula incende ya kucepesha.¹⁰ Lelo ulo walalikwa, kabije wikale ku ncende yakucepesha, pakwebati ulo uyo ukulalikile afika, kuti alanda kuli webo ati, 'Cibusa wandi, ima selela pa mulu.' Elo uka cindamikwa mu menso ya abo bonse abakuweme nobe.¹¹ Pantu uyo onse uuisumbula umwine akacefeshiwa, na uyo onse uuiicefya umwine akasumbulwa."¹² Yesu alilandile naku muntu uwa mulalikile ati, "Ulo wacita umulalilo nangula umwikulo, wilalika abanobe nangula ba munonko nangula ba lupwa bobo nangu abena mupalamano abakankala, pantu nabo kuti bakulalika mu cibweshi, kabili uli no kubweseshiwa amalipilo."¹³ Lelo ulo wacita umwikulo, lalika ababusu, abalema, abakulemana amolu, ne mpofu,¹⁴ kabili uli no ku palwa, pantu tekuti ba kubweseshiwa amalipilo. Pantu uli no kubweseshiwa amalipilo mukubushiwa kwa balungami."¹⁵ Ulo umo pali abo aba ikele na Yesu pe tebulo aumfwile ifi fintu, alilandile kuli ena ati, "Uwakupalwa ni uyo ukalya umukate mu bufumu bwa kwa Lesa!"¹⁶ Lelo Yesu alilandile kuli ena ati, "Umuntu umo alipekenye umulalilo ukalamba no kulalika abengi."¹⁷ Pa nshita ya mulalilo, alitumine ababomfi bakwe ukuya kulanda kuli abo abalalikwe ati, 'Iseni, pantu fyonse nomba filipekanishiwe.'¹⁸ Bonse cimo cine balitendeke ukupanga umwakubepesha. Uwa kubalilapo alilandile kuli ena ati, 'Ndishitile mpanga, kabili mfwile ukuya kuimona. Nkokupapata leka ndekuya.'¹⁹ Na umbi alilandile ati, 'Ndishitile ng'ombe sha ku makoli yasano, kabili nkoya muku shesha. Nkokupapata leka ndekuya.'²⁰ Elo na umbi umuntu alilandile kuli ena ati, 'Ndyupile umukashi, eco tekuti ngise.'²¹ Umubomfi alishile kweba shikulu wakwe ifi fintu. Kabili shikulu wa ng'anda alifulilwe no kulanda ku mubomfi wakwe ati, 'Kabije bwangu mu misebo iyi kalamba ne inono iya mushi kabili ulete kuno ababusu, abalema, Impofu, na bakulemana amolu.'²² Umubomfi alilandile ati, 'Mwe shikulu, ifyo mwacikonkomesha filicitilwe, lelo kwena mucili ncende.'²³ Shikulu alilandile ku mubomfi ati, 'Kabije mu nshila sha pabuka na mutushila twa mu mpanga no kubapatikisha ukwisa kwingila, pakwebati ing'anda yandi ingesula.'²⁴ Pantu nkolanda kuli webo nati, tapali nangu umo pali balya bantu nalalike abakosonda umulalilo wandi."²⁵ Nomba amabumba ayakalamba yali kuya nankwe, kabili alipilibukile no kulanda kuli bena ati,²⁶ "Umfwa uuli onse aisa kuli nevo no ku kana pata wishi, nyina, umukashi, abana, bamunyina na bakanshi, no mweo wakwe kumo, tekuti abe umusambi wandi."²⁷ Uyo onse uutasenda icapindama cakwe umwine no ku konka tekuti abe umusambi wandi.²⁸ Pantu ninani pali mwebo uwinga kabila ukukula ulupungu uutabalilapo ukwikala panshi no kupenda icipendo ukumona nga cakwebati alikwete fyonse ifikofwaikwa pa kulupwisha?²⁹ Nga teifyo, ulo atendeka umufula elo afilwa ukupwilishisha, abo bonse abakomonako bali noku tendeka ukumupumya,³⁰ ukulalanda ati, 'Uyu muntu alitendeke ukukula kabili alifulilwe ukupwisha.'³¹ Nangu ni mfumu ndo, ulo ikoya ku kulwa ne mfumu imbi, tekuti ibalilepo ukwikala panshi no kupandwa amano nga cakwebati ifita fyakwe amakana ikumi kuti fya lwishanya na imbi mfumu ili ne fita amakana amakumi yabili?³² Nga teifyo, ulo ifita fimbi ficili apatali, akotuma inkombe isha kuya ku mwimininako no kuya kwipusha umo bengomfwanina.³³ Eco kanshi, uuli onse

pali mwebo uushilekelako fyonse ifikwatwa fyakwe tekuti abe umusambi wandi.³⁴Umucele wabune, lelo ngo mucele wasunduka, bushe kuti waloweshiwa na kabili? ³⁵Taukwete umulimo ku mushili nangu ni ku mufundo. Ulaposwa fye. Uyo uli na matwi ya kumfwa, na omfwe."

15

¹Nomba bonse bakasonkesha wa musonko na babembu balikwisa kuli Yesu mu kumfwa kuli ena. ²Bonse abaFarise na bakalemba balikuilishanya umo no munankwe, ukulanda ati, "Uyu muntu alapokelela ababembu, no kulya nabo." ³Yesu alilandile uyu umulumbe kuli bena, ukwebati, ⁴"Ninani pali mwebo, umfwa alikwete impanga umwanda umo elo alufyapo imo, uushingasha ishili amakumi pabula na pabula mu matololo no kuya akofwaya iilubile mpakafye aisanga? ⁵Nomba ulo aisanga, aibika pa mabeya yakwe no kusekekela. ⁶Ulo aisa ku ng'anda, aita ifibusa fyakwe na bena mupalamano pamo, no kulanda kuli bena ati, 'Sekeleleni pamo na nebo, pantu ndisangile Impanga nalufishe.' ⁷Nkomweba nati ifyo fine efyo cikaba, kukaba insansa ku mulu pa mubembu umo uwalapila, ukucila abali amakumi pabula na pabula abantu abalungami abashikokabila ukulapila. ⁸Nangu ninani umwanakashi uukwete indalama isha silfere ishamuwaya ikumi, umfwa alufye imo, bushe tekuti asanike inyali, apyange na mu ng'anda, no kufwaya bwino mpakafye aisanga? ⁹Ulo aisanga, aita pamo abanankwe na bena mupalamano bakwe, abeba ati, 'Sekeleleni pamo na nebo, pantu ndisangile indalama nalufishe.' ¹⁰Nangu cibefyo, nkolanda kuli mwebo nati, kuli nsansa muceni ca ba malaika bakwa Lesa palwa mubembu umo uwalapila." ¹¹Nolu Yesu alilandile ati, "Umuntu umo alikwete abana babili abaume, ¹²no mwaice bantu alilandile kuli wishi, "Tata, mpeniko icakaniko candi pa fyuma fyenu." Eco alibakenya ifyuma fyakwe bonse babili. ¹³Tapapitile nshiku ishingi, umwaice alikolonganike fyonse ifyo akwete no kuya ku calo ukutali, kabili kulya alyonawile ifyuma fyonse mukuipoisaika. ¹⁴Nomba ulo aonawile fyonse, icipowe icikalamba cali salangene mu calo cilya, kabili alibulilwe. ¹⁵Alile kwingila icinto ku mwikashi umo uwa mu calo cilya, uyo uwa mutumine mu mabala yakwe mukulisha inkumba. ¹⁶Alikukabila ukulyako ifilyo fya nkumba pantu takwali nangu umo uwakumupa ifili fyonse. ¹⁷Lelo umwana umwaice alikutulwike umwine, alilandile ati, "Ni banga ababomfi tata akwata abalya imikate iingi, na pano ndi, nkofwa ku nsala! ¹⁸Nkoima ukufuma kuno no kuya kuli tata wandi, no kuya kulanda kuli ena ati, "Tata, nalibembukila umulu na mwebo. ¹⁹Nshilingile ukwitwa umwana wenu; ndengeni ukuba umo pa babomfi benu abo mwaingisha." ²⁰Eco Umwana umwaice alimine no kufumako no kwisa kuli wishi. Ulo acili akatamukila wishi alimumwene kabili aliketwe inkumbu, no ku mubutukila no ku mukumbatila no ku mutomona. ²¹No mwana alilandile kuli ena ati, "Tata, Nalibembukila umulu na mwebo. Nshilingile ukwitwa umwana wenu." ²²"Bawishi balilandile ku babomfi babo ati, 'Leteni bwangu umwingila uwabune sana, mufwikeni, kabili bikenininda munwe ku kuboko kwakwe, ne ndyato ku makasa yakwe. ²³Nolu mulete no mwana wa ng'ombe uwakwina no kwipaya. Natuilemene no kwanga! ²⁴Pantu umwana wandi alifwile, nomba ali no mweo. Alilubile, nomba alisangilwe.' Nolu balitendeke ukusefya. ²⁵"Nomba umwana umukalamba ali mwibala. Ulo abwelele akopalamina ku ng'anda, alyumfwile inyimbo no kucinda. ²⁶Alikutilepo umo umubomfi no kumwipusha ati nindo ikocitika. ²⁷Umubomfi alilandile kuli ena ati, 'Ndume yenu alibwelele ku ng'anda na bawiso balimwipaila akana ka ng'ombe akaina pantu balimupokelele umumi. ²⁸Umwana umukalamba bantu alifulilwe alikene no kwingilamo, nawishi alifumine no kwisa kumupapabila. ²⁹Lelo Umwana umukalamba bantu aliyasukile nokulanda kuli wishi ati, 'Lolesheni, iyi myaka iingi nali mibombela ngo musha, nshasulilepo icipope cenu nangu cimo, lelo tamwampelepo nangu kana ka mbushi ukwebati nsemfye na banandi, ³⁰Lelo ulo uyu mwana wenu eshile, uwaonawile ubwikashi bwenu na ba cilende, mwamwipaila akana ka ng'ombe akakwina. ³¹"Bawishi balilandile kuli ena ati, 'We mwana, lyonse waba nanebo, na fyonse ifyandi fyobe. ³²Lelo cacilinga ukwebati tusefye no kusekelela, pantu uyu wenu alifwile, nomba ali no mweo, alilubile, nomba alilondweke.'"

16

¹Yesu nakabili alilandile ku basambi ati, "Kwalipo umuntu umo umukankala uwakwete kangalila, kabili calyebelwe kuli ena ukwebati uyu kangalila alikumonaula ifikwatwa fyakwe. ²Eco mukankala alimukutile no kulanda kuli ena ati, 'findo ifi nkoumfwa pali webo? pela ubulondoloshi pa mibombe yobe, pantu taukotwalilile ukuba kangalila. ³"Kangalila aliisoseshe umwine eka ati, 'Nkocita shani, apo shikulu wandi akontafya imilimo ya bukangalila? Nshakwata maka ya kulima, kabili nalikwata nsoni sha kulomba. ⁴Ndishibile ifyo nkocita, pakwebati ulo bakontamfya imilimo, abantu bakampokelela mu mayanda yabo. ⁵Nomba kangalila alikutile bonse abali ne misha kuli shikulu wakwe, no kwipusha uwa kubalilapo ati, 'Nishinga wakongola kuli shikulu wandi? ⁶Alilandile ati, 'Amabotolo ya mafuta umwanda umo.' ⁷"Alilandile kuli ena ati, 'Bula kalata wa misha yobe, ikala panshi bwangu, no kulemba amabotolo ya mafuta amakumi yasano.' ⁸"Elo kangalila alanda na kuli umbi ati, 'Nishinga wakongola? ⁹Alilandile ati, 'Amasaka ya ngano umwanda.' ¹⁰"Mushika atile, "bula kalata obe uwa nkongole, no kulembapo amakumi cinekonse - konse." ¹¹Shikulu alitashishe kangalila uushili mulungami pantu alibomfeshe amano ya bucenjeshi. Pantu abana ba cino calo balicenjelesha mukubomba na bantu babo ukucila abana ba lubuto. ¹²Nkolanda kuli mwebo nati, pangeni ifibusa mwebene ukubomfya ifyuma ifyakubula ubulungami pakwebati ilyo fikapwa, benga mipokelela mubwikashi bwa muyayaya. ¹³Onse uwacishinka mutunono sana wacishinka na mufingi, noyo uushalungama mutunono tekuti alungame na mufingi. ¹⁴Umfwa tawaba na bucishinka mukubomfya ifyuma ifyabula ubulungami, ninani akakucetekela mufyuma fya cishinka? ¹⁵Umfwa tauli na cishinka mukubomfya ifipe fya bantu bambi, ninani wingakupela indalama ishobe? ¹⁶Takwaba umusha uwinga bombela imfumu shibili, pantu kuti apata umo atemwapo umbi, nangu akaipeleshapo kuli umo no kusula umbi. Tekuti ubombele

Lesane fyuma."¹⁴ Nomba abafarise, abatemenwe indalama, balyumfwile ifintu fyonse ifi, kabili balimusushishe.
¹⁵ Alilandile kuli bena ati, "Mulaiwaminisha mwe bene mu menso ya bantu, lelo Lesa alimishiba imitima yenu. Uyo uukoisansabika pa bantu wa muselu mu menso yakwa Lesa."¹⁶ Amalango na bakasesema fyalikubomba mpaka ulo Yohane aishile. Ukufuma ilya nshita, imbila ya bufumu bwa kwa Lesa ikobilwa, na onse alafwaya ukuipatikisha ukwingila muli iyi inshila.¹⁷ Lelo cakwanguka ku mulu ne sonde ukupita ukucila akalitoni ka malango ukuba akafye.¹⁸ Onse uwaleka umukashi wakwe nokuya kupa umbi acita ubucende, noyo uwayakupa uwakanwa nao wine acita ubucende.¹⁹ Nomba kwalipo umuntu umukankala uwalikufwala insalu ishakukashikila neshakolokondwe kabili alikuipakisha cila bushiku pa fyuma fyakwe ifingi.²⁰ Kwaliko na kalomba lombamo ishina lyakwe ni Lasaro alikwikala pa mpongolo yakwe, alikwete ifilonda,²¹ alikukabila ukulya utwalikupona kwitebulo lya mukankala. Ne mbwa nasho shalikwisa muku myanga ifilonda fyakwe.²² Caishile kuba ukwebati umulanda alifwile na bamalaika bali musendele nokumutwala kulubali lwakwa Abrahamu. No mukankala nao alifwile no kushikwa,²³ na ku mboo, ulo ali akolunguluka, ali nwine amenso yakwe no kwisa kumona Abrahamu akatalamukila na Lasaro ku lubali lwakwe.²⁴ Eco alibilikishe nokulanda ati, "Tata Abrahamu, mbeleleniko uluse no kuntuminako Lasaro, aye kutumpika aka lutwe kamunwe wa kwe mu menshi no kwisa ntalalikako palulimi lwandi, pantu ndi culile muli ulu lubingu."²⁵ Lelo Abrahamu alilandile ati, "We mwana, ibukisha ukwebati mubwikashi bobe walipokelele ifintu fyobe ifya bune, elo Lasaro aliculile mupamba. Lelo nomba alisansamushiwe kuno, nobe ukomanama."²⁶ No kucilishapo, paliba umuyenge pakati, pakwebati abakofwaya ukwabuka ukufuma kuno ukwisa kuli webo tekuti ficitike, kabili takuli nangufye umu uwingabuka ukufuma uko ukwisa kuli fwebo.²⁷ "Umukankala atile, "Nkomipapata, Tata Abrahamu, nkofwaya mumutumeko ku ng'anda yakwa tata ----²⁸ pantu nalikwata indume shisano - pakweba aye kubasoka, pakwebati cikaba ati nabo baisa kuli ino ncende ya kulunguluka."²⁹ Lelo Abrahamu alilandile ati, 'Balikwete Mose na bakasesema; baleke bakutike kuli bena.'³⁰ Umukankala alyaswike ati, 'Iyoo, Tata Abrahamu, lelo umfwa umu aye kulibena uwakufuma ku bakufwa, bakolapila.'³¹ "Lelo Abrahamu alilandile kuli ena ati, 'Umfwa tabomfwile kuli Mose na bakasesema, tekuti bomfwe no kusumina nangufye umu enga kuba ukufuma ku bakufwa."

17

¹ Yesu alilandile ku basambi bakwe ati, "Calishibikwa ukwebati kukabako ifipunwiso, akalanda kuli uyo muntu fyaishilamo!"² Kuti camuwamina umfwa uyu bamukakila icilibwe ca mpelo ukumushingulusha mu mukoshi kabili nga aliposelwe muli bembapakweba ati talengelepo umu muli aba abanono ukuipununa.³ Ilindenimwebene. Umfwa wenu abembuke, mukalipile, kabili umfwa alapila, mweleleko.⁴ Umfwa akubifya imiku cinelubali mu kasuba kamo, kabili abwela imiku cinelubali kuli webo, ukwebati, 'Nalapila,' ufwile wa mwelele!"⁵ Abatumwa balilandile kuli Shikulu ati, "Kusheni icitetekelo cesu."⁶ Shikulu alilandile ati, "Umfwa mwalikwete icitetekelo ngo luseke lwa lubanga, kuti mwalanda kuli ici icimuti ca maluberi ati, 'Nukuka, kabili kabyalwe muli bembapakweba,' naco kuti cakubela."⁷ Lelo ninani pali mwebo, uwakwata umubomfi wa kumulimina nangula uusunga impanga, uwinga mweba ulo afumafye kwibala ati, 'Isa apapapenefye no kwikala mukulya?'⁸ Bushe tekuti alande kuli ena ati, 'Mpekanishishako ifyakulya, kabili bikamo umushipi mu fyakufwala fyobe no kumpyungila mpakafye mpwishe ukulya no kunwa. Nolu panuma nobe ukolya no kunwa?'⁹ Tatashako umubomfi pantu alicitile ifintu ifyo amukonkemeshe, bushe alacita?¹⁰ Umfwa acikaba ifyo na mwebo bene, ulo mwacita ifyo bamunkonkomesha, mwebe ati, "Tuli babomfi abashalinga. Tucitilefye ifyo tulingile ukucita."¹¹ Casangilwe ukwebati ilyo ali munshila ukuya ku Yerusalemu, apitile mu mupaka waba pakati ka Samaria na Galili.¹² Ulo aingile mu mushi umu ifi, kulya alikumene naba baume ikumi abali ne fibashi. Baliminine akatalamukila ukufuma apo ali¹³ kabili balisanswile amashiwi yabo, ukwebati, "Yesu, Shikulu, tubeleleniko uluse."¹⁴ Ulo abamwene, alilandile kuli bena ati, "Kabiye ni muye kulanga kuli ba shimapepo." Ulo balikuya balisangulwike.¹⁵ Ulo umu pali bena amwene ati apola, alyalulwike, no kubilikisha ishiwi ukulumbanya Lesa.¹⁶ Awile ubunkumpeme pa makasa yakwa Yesu, no kumutotela. Nomba ali mwina Samaria.¹⁷ Nolu Yesu alilandile ati, "Bushe tabaciba ikumi abasangulwilwe? Bushe abali pabula bambi bali kwi?"¹⁸ Takuli na bambi abakwisa kupela ubukata kuli Lesa, Kano fye uyu mwina fyalo?"¹⁹ Alilandile kuli ena ati, "Ima, no kuya. Icitetekelo cobe cilikuposeshe."²⁰ Pa kumwipusha ku bafarise ulo ubufumu bwakwa Lesa bukesa, Yesu alibaswike no kulanda ati, Ubufumu bwakwa Lesa tabwisa ne cakumwenako.²¹ Nangu tabakalande ati, 'Lolesheni, ubu apa!' nangu, 'Bulya palya!' Pantu moneni, ubufumu bwa kwa Lesa buli muli mwebo."²² Alilandile ku basambi ati, "Inshiku shikoisa ulo mukafwaya ukumona ubushiku bumo pa nshiku sha Mwana wa Muntu, lelo tamwaka bumone."²³ Nolu bakamweba ati, "Lolesheni, palya! Lolesheni, Pano!" Lelo mwiyo nangu ukubabutukila,²⁴ pantu nga filya inkuba isanikisha ulo imyashe ukufuma ku ciputulwa cimo ica mulwelele ukutwala ku ciputulwa cimbi ica mulwelele, efyo no Mwana wa Muntu akaba pali ubu bushiku.²⁵ Lelo pakubala afwile ukucula mu fintu ifngi no kukanwa na iyi nkulo.²⁶ Nga fintu cacitike mu nshiku shakwa Noa, efyo cikacitika na mushiku sha Mwana wa Muntu.²⁷ Balikulya, balikunwa, balikupa, kabili balikubofya mu fyupo ukufikafye ulo Noah aingile mu cibwato - ne lyeshi lyalishile no kubonaula bonse fye.²⁸ Mu musango umu wine, kabili ngefyo cacitike munshiku shakwa Loti - Balikulya no kunwa, ukushita no kushitisha, ukubyalala no kukula.²⁹ Lelo mu bushiku ubo Loti afumine mu Sodoma, kwalokele umulilo na sulfere ukufuma mu mulu no konaula bonse fye.³⁰ Mumusango umu wine efyo cikaba na mu bushiku ubo Umwana wa Muntu asokololwa.³¹ Muli ubo bushiku uyo uuli pa mutenge wa ng'anda eikapo ukuya mukubula ifipe ukufuma mu ng'anda yakwe, na mumusango umu wine lekeni uyo uuli mwibala ebweluluka.³² Ibukisheni muka Loti.³³ Uyo uukofwaya ukunonka umweo wakwe akaulofya, lelo uyo uukolofya umweo wakwe akaupususha.³⁴ Nkomweba nati, muli bulya bushiku kukaba abantu babili mu busanshi bumo. Umu akasendwa, umbi akashala.³⁵ Kukaba banamayo babili

abakalapela inseke pamo. Umo akasendwa, na umbi akashala.³⁷ Balimwipwishe ati, "Nikwi, mwe Shikulu?" Alilandile kuli bena ati, "Ukuli icitumbi ca mubili, eko na makubi ya longana capamo."

18

¹Nolu alibelele umulumbe pafyo bafwile ukupepa lyonse kabili ukwabula ukunenuka, ²Ukwebati, "mu musumba umo mwalipo kapingula uatalikutina Lesa kabili uatali kucindika bantu.³ Nomba mwali mukamfwilwa muli ulya musumba, uwali kwisa ilingi kuli ena, ukwebati, 'Ngafweniko ukupingula mukulinganya noukotoshanya na nebo.' ⁴Panshita ntali alikene ukumwafwilisha, nomba elo papitile akashita aliisoseshe umwine, nangula ntatina Lesa no kucindika umuntu, ⁵lelo pantu uyu mukamfwilwa akompanga icongo, nkomwafwilisha ukukwata umulinganya, pakwebati tanashishe pakwisa kwakwe ukwa libili - libili." ⁶Nolu Shikulu alilandile ati, "Kutikeni kufyo kapingula wabula umulinganya alanda. ⁷Nomba Lesa takaleta umulinganya ku basalwa bakwe abakolilila kuli ena akasuba no bushiku? Bushe akashinga-shinga inshita iitali pali bena? ⁸Nkomyeba nati akaleta ubupingushi pali bena mukwangufyanya. Nangu cingaba ifi, ulo Umwana wa Muntu akesa, Bushe mucinefye akasangapo icicetekelo pe sonde?" ⁹Nolu nakabili alilandile uyu mulumbe kuli bamo abaicetekele abene ukwebati balungami no kususha abantu bambi, ¹⁰"Abaume babili balile mwi tempele mu kupepa - umo ali muFarise na umbi ali ni kasonkesha wa musonko. ¹¹UmuFarise aliminine no kupepa ifi fintu palwakwe umwine, 'Mwe Lesa, nkomitotela pantu ntali kubati nyaba bantu bambi - abapupu, abantu bashalungama, abacende - nangu kubati ni bakasonkesha wa musonko. ¹²Ndafunga ukulya imiku ibili cila mulungu. Ndapela icekumi muli fyonse ifyo nkwata.' ¹³Lelo kasonkesha wa musonko, aliminine akatala mukila, tekuti afwaye no kwinuna amenso ku mulu, lelo aikunkunshishe icifuba cakwe, ukwebati, 'Mwe Lesa, mbeleleni uluse, ne mubembu.' ¹⁴Nkomyeba nati, uyu muntu alibwekelele ku ng'anda yakwe uwa lungamikwa ukucila ulya umbi, pantu onse uisansabika umwine bakamupefya, lelo onse uicefya bakamusansabika." ¹⁵Abantu balikumuletela utunya utunono pakwebati atwikatemo, lelo ulo abasambi bamwene ifi, balibakalipile. ¹⁶Lelo Yesu alibakutile kuli ena, ukwebati, "Suminisheni abana banono bese kuli nebo, kabili mwibalesha. Pantu ubufumu bwa kwa Lesa bwa bakuba ifi. ¹⁷Mucinefye nkolanda kuli mwebo nati, onse utakapokele ubufumu bwakwa Lesa kubati kana konono mucinefye takengilemo." ¹⁸Umo kateka alimwipwishe, ukwebati, "We kasambilisha wabune, nkocita shani pakwebati nkapyane umweo wa muyayaya?" ¹⁹Yesu alilandile kuli ena ati, nindo wankutila uwabune? Takwaba wabune, kanofye Lesa eka. ²⁰Walishiba amafunde -wilekucita bucende, wilekwipaya, wilekwiba, wilekupela bukambone bwabufi, cindika wiso na noko." ²¹Kateka alilandile ati, "Ifi fintu fyonse ndafibela ukufuma munshita iyo nali umusepela." ²²Ulo Yesu aumfwile filya, alilandile kuli ena ati, "Icintu cimo ucili ukobulisha. Ufwile washitisha fyonse ifyo wakwata no kufipela ku balanda, kabili nobe uli no kukwata ifyuma ku mulu - kabili isa, unkonke." ²³Lelo ulo kateka aumfwile ifi fintu, alyumfwile sana ubulanda, pantu ali umukankala sana. ²⁴Elo Yesu, pakumumona alilandile ati, "Ifyo cayafya umukankala ukwingila mu bufumu bwakwa Lesa! ²⁵Pantu cayangukapo ingamila ukupula mu linso lya shindano, ukucila umuntu umukankala ukwingila mu bufumu bwakwa Lesa." ²⁶Abo abalikumfwa ifi balilandile abati, "Ninshi nani uwingapusuka?" ²⁷Yesu alyaswike ati, "Ifintu ifyakukosa ku bantu fya kwanguka kuli Lesa." ²⁸Petero alilandile ati, "kwena, fwebo twalisha fyonse ifyo twakwete no ku mikonka." ²⁹Yesu alilandile kuli bena ati, "Mucinefye, nkolanda kuli mwebo ukwebati takwakabe uwasha ing'anda, nangu umukashi, ba munyina, nangu abafyashi, nangu abana, pa mulandu wa bufumu bwakwa Lesa, ³⁰uushakapokelele ifingi muli ino nshita, na mushita ikoisa, umweo wa muyayaya." ³¹Panuma akolonganika abekumi na babili ku mwine, alilandile kuli bena ati, "Moneni, tukoya ku Yerusalemu, na fyonse ifintu ifyalembwa kuli bakasesema palwa Mwana wa Muntu fili no kufikilishiwa. ³²Pantu ali no kupelwa ku bena Fyalo, ukumupumya, no kumusebanya, no kumusakila amate. ³³Panuma ya kumufupaula, bali no kumwipaya, kabili no bushiku bwakulenga shitatu akabuka na kabili." ³⁴Tabaishibepo nangu cimo pali ifi fintu, na aya mashiwi yalifishilwe kuli bena, tabakwete ubwishibilo pa fintu ifyali kulandwa. ³⁵Calishile kubati ukwebati, ulo Yesu apaleme ku Yeriko, kwaliko muntu umo impofu uwaikela mu mbali ya nshila akolomba, ³⁶kabili pakumfwa ibumba likopita, alipwishe ifyali kucitika. ³⁷Bali mwebele ati ni Yesu amwina Nasareti akopita. ³⁸Eco impofu yalibikilishe, ukwebati, "Yesu, Mwana Dabidi, mbeleleni uluse." ³⁹Abalikuya pantashi balikalipile iyi mpofu, ukuyeba ukwikala tondolo. Lelo yalipundishe ukucilamo, "Mwana Dabidi, mbeleleni uluse." ⁴⁰Yesu aliminine no kubakonkomesha ukwebati umwaume bamulete kuli ena. Nolu ulo umwaume impofu apalamine, Yesu alimwipwishe ati, ⁴¹"Nindo ukofwaya nkucitile?" Alilandile ati, " Mwe Shikulu, nkofwaya ukumona." ⁴²Yesu alilandile kuli ena ati, "Mona. Icicetekelo cobe cakuposha." ⁴³Apopenefye alishibwile amenso no ku mukonka, akopela ubukata kuli Lesa. Abantu bonse, ulo bamwene ifi, balilumbenye Lesa.

19

¹Yesu alingile kabili alikupita mu Yeriko. ²Moneni, mwali umuntu umo uwaleitwa Sakeo. Ali mukalamba wa bakasonkesha wa misonko kabili ali umukankala. ³Alikufwaisha ukumona Yesu nga ali ninani, lelo alifilwe ukumumona mwi bumba, pantu ali ne cimo icipi. ⁴Napalici alibutukile ku ntanshi ya bantu no kunina ku cimuti ca mukunyu ukwebati amumone, pantu Yesu ali no kupita kuli ilya inshila. ⁵Ulo Yesu afikile pali ilya ncende, aliloleshe ku mulu no kulanda kuli ena ati, "Sakeo, ika mukwangufyanya, pantu ilelo mfwile ukwikala mu ng'anda yobe." ⁶Eco alyangunfyenye ukwikala ku cimuti no kumupokelele ne nsansa. ⁷Ulo bonse bamwene ifi, bonse balilishenye, ukwebati, "Aya mukutandalila umuntu umubembu." ⁸Sakeo aliminine no kulanda kuli Shikulu ati, "Lolesheni, mwe Shikulu, citika wa fikwata fyandi nkopela ku bapina, kabili umfwa nalifinshanyapo uuli onse ifili fyonse, nkomubwesha imiku ine." ⁹Yesu alilandile kuli ena ati,

"Ilelo Ipusukilo lilishile muli ino ng'anda, pantu nao uyu mwana wakwa Abrahamu. ¹⁰Pantu Umwana wa Muntu aishile ku kufwaya no kupususha abantu abakuluba. ¹¹"Ulo baumfwile ifi fintu, alikonkenyepo ukulanda no kubeba umulumbe, pantu alipaleme ku Yerusalemu, kabili bali kutontontanya ukwebati ubufumu bwakwa Lesa bwala monekela ililinefy. ¹²Eco alilandile ukwebati, "Umukankala umo alile ku calo ukutali ku kuipokela umwine ubufumu elo no kubweluluka. ¹³Alikutile ababomfi bakwe ikumi no kubapela indalama ikumi no kulanda kuli bena ati, 'Mulekucita amakwebo mpaka nkabwele.' ¹⁴"Lelo abekashi ba mu calo cakwe balimupatile no kutuma inkombe ukumukonka, ukwebati, 'Tatukofwaya uyu muntu ukututeka.' ¹⁵Calicitike ulo abwelulwike, pa kupokelela ubufumu, alikonkomeshe ababomfi abo apele indalama ukwebati baye kuli ena, pakwebati eshibe ifyo basandulwile ukupitila mukucita amakwebo. ¹⁶"Uwa ntashi alishile kuli ena, ukwebati, 'Mwe Shikulu mu ndalama yenu ndi pangilemo indalama na shimbi ikumi.' ¹⁷"Umukankala alilandile kuli ena ati, 'Wacita icabune, we mubomfi wabune. Pantu wali uwacinshinka na mutunono, ukoba ne nsambu pa misumba ikumi.' ¹⁸"Uwa cibili alishile, akoeba ati, 'indalama yenu, shikulu, ilipangile indalama shisano.' ¹⁹"Umukankala alilandile kuli ena ati, 'Walekulolekesha pa misumba isano.' ²⁰"Naumbi alishile, ukwebati, 'Shikulu, indalama yenu iyi, iyo nasungile bwino mu nsalu, ²¹pantu nalikumitina, pamulandu muli muntu uukabila sana. Mubula neco tamwabikile, musombola napo tamwatandile.' ²²"Umukankala alilandile kuli ena ati, 'Pa mashiwi yobe epo nkokupingwila, we mubomfi mubi. Walishibe ukwebati ndi muntu uukabila sana, nsenda nefyo nshabikile no kusombola efyo nshabyele.' ²³Kanshi nindo tawabikile indalama yandi mukuissekesha, pa kwebati ulo nabweluluka nga nalisangile shililanduluke pali naka nsonse? ²⁴"Umukankala alilandile ku baiminine mupepi ati, 'Mupokeni indalama, kabili peleni ku uukwete indalama ishili ikumi.' ²⁵"Nabo balilandile kuli ena abati, 'Mwe shikulu, alikwete indalama ikumi.' ²⁶"Nkolanda kuli webo, ukwebati onse uwakwata akapelelwapo na fimbi, lelo uushakwata, akopokololwa noto akwata. ²⁷Lelo aba abalwani bandi, abo abashalikufwaya nebo ukuteka pali bena, baleteni kuno no kubepaya pa cinso candi. ²⁸"Ulo alandile ifi fintu, alikonkenyepo ukwenda, ukuya ku Yerusalemu. ²⁹Calishile kuba ukwebati ulo apaleme ku Betfage na Betani, pa lupili ulwitwa ulwa Miolife, alitumine abasambi babili, ³⁰ukwebati, "Kabiyeni mu mushi uukonkelepo. Ulo mukoingila mukosanga umwana wa mpunda utaninwapo. Mu mukakule mumulete kuli nebo. ³¹Umfwa umuntu amipushe ati, 'Nindo mukomukakwila?' mulande ati, 'Shikulu akomukabila.' ³²Abo abatuminwe balisangile umwana wa mpunda nga filya fine Yesu abebele. ³³Ulo bali bakokakula umwana wa mpunda, abene balilandile kuli bena ati, "Nindo mukokakwila umwana wa mpunda?" ³⁴Balilandile ati, "Shikulu akomukabila." ³⁵Balimuletele kuli Yesu, kabili balyanshikile amalaya yabo pa mwana wa mpunda na Yesu alinininepo. ³⁶Ulo alikuya, balyanshikile amalaya yabo pa musebo. ³⁷Nomba ulo ali akopalamina ku ncende uko ulupili lwa miolife lwa tentemukila, ibumba lyonse ilya basambi lyalitendeke ukusekelela no kulumbanya Lesa ne shiwi ilikalamba pa milimo yonse iya maka iyo bamwene, ³⁸bakolanda ati, "Yakupalwa Imfumu iisa mwi shina lyakwa Shikulu! Umutende mu mulu no bukata umwapulamo!" ³⁹Bamo abaFarise mwi bumba balilandile kuli ena ati, "Kasambilisha, kalipileni abasambi benu." ⁴⁰Yesu alyaswike no kulanda ati, "Nkomweba nati, umfwa aba batalala tondolo, amabwe kuti yabilikisha." ⁴¹Ulo Yesu apalamine mu musumba, alililile palwa wena, ⁴²ukwebati, "Umfwa walishibe muli ubu bushiku, nobe, ifintu ifikuletela umutende! Lelo nomba fyali fiswa ku menso yenu. ⁴³Pantu inshiku shikoisa pali webo ulo abalwani bobo bakakula ilinga ukukushinguluka no ku kutitikisha mu mbali shonse. ⁴⁴Bakakuwisha panshi pa mushili, na bana bobo pamo nobe. Tabakaleke ilibwe likekale palibiye pantu tawaishibe inshita ya kutandalilwa kobe. ⁴⁵Yesu alingile mwi tempele no kutendeka ukutamfyamo abo bonse abali kushitisha, ⁴⁶ukulanda kuli bena ati, "Calilembwa ati, 'Ing'anda yandi ikaba ni ng'anda ye pepo, 'lelo mwebi mwaicita icisankano ca bapupu.' ⁴⁷Eco Yesu alikusambilisha cila bushiku mwi tempele. Bashimapeppo bakalamba na bakalemba balikufwaya ukumonaula, nge fyali kufwaya intungulushi sha bantu, ⁴⁸lelo tabasangile inshila yaku citilamo ifi pantu abantu bonse balikukutikisha kuli ena sana.

20

¹Calicitikile ubushiku buno ulo Yesu alikusambilisha bantu mwi tempele no kubila imbila nsuma ukwebati bashimapepo bakalamba na bakalemba balishile kuli ena pamo na bakalamba. ²Balilandile, ukumwebati, "Twebe ni munsambu nshi ucitila ifi fintu, nangu ninani wakupela ishi nsambu." ³Alyasukile no kulanda kuli bena ati, "Nandibo nkomipusha ilipusho, na mwebi munjebe. ⁴Ulubatisho lwakwa Yohane: Bushe lwafumine ku mulu nangu ku bantu?" ⁵Nabo balilanshenye abene, ukwebati, "Umfwa tulande ati, 'Lwafumunine ku mulu,' akolanda ati, 'Nolu nindo mutamusuminine?' ⁶Lelo nga twalanda ati, 'Lwafumunine ku bantu,' abantu bonse bakotulasa amabwe, pantu balisumina ukwebati Yohane ali ni kasesema." ⁷Eco balyasukile ukwebati tabaishibile uko lwafumine. ⁸Yesu alilandile kuli bena ati, "Nandibo nshamyebe insambu ncitilamo ifi fintu." ⁹Alyebele abantu uyu mulumbe ati, "Umuntu alilimine ibala lya myangashi, alilisekeshe ku balimi ba myangashi, kabili alile ku calo cimbi panshita iitali. ¹⁰Pa nshita yakulinga alitumine umubomfi ukuya ku balimi ba myangashi, ukwebati baye kumupelako ifisabo fya mwibala lya myangashi. Lelo abalimi ba myangashi balimuline, no kumutamfya minwe - nkutwa. ¹¹Kabili alitumine umubomfi umbi nao balimuline, bali musalwile, balimutamfishe minwe - nkutwa. ¹²Kabili alitumine uwakulenga butatu nao balimucenene, no kumuposa kunse. ¹³Eco shikulu we bala lya myangashi alyebele ati, 'Nkocita shani? Nkotuma umwana wandi uwatemiwika. Limbi bakoya kumucindika.' ¹⁴"Lelo ulo abalimi ba myangashi bamumwene, balilanshenye abene beka, ukwebati, uyu empyani. Natumwipaye, pakwebati ifyabupyani fibe fyesu. ¹⁵Balimuposele kunse ye bala lya myangashi no kumwipaya. Nindo kanshi shikulu we bala lya myangashi akacita kuli bena? ¹⁶Akesa konaula aba balimi ba myangashi, no kupela ibala lya myangashi kuli mambi." Ulo baumfwile ici, balilandile ati, "Cikaba ifyo!" ¹⁷Lelo Yesu aliloleshe pali bena, no kulanda ati,

"Calola mwisa ico icalembwa: 'Ilibwe ilyo bakakula basulile elyaaluka ilya pa cifutu?'¹⁸ Onse uwaponena palibwe lilya akaputaulwa mutupimfya, na onse uo lyaponena akashonaulwa."¹⁹ Eco ba kalemba na bashimapepo bakalamba balifwaile ukumwikata munshita ilya ine, pantu balishibe ukweba ati ni bena alandile uyu mulumbe. Lelo balikutina abantu.²⁰ Balikumulolekesha, balitumine inengu isho ishaifungwishe ukuba abakulungama, pakwebati benga sanga ifilubo mukulanda kwakwe, pakweba ati bamutwale ku buteko na ku nsambu shakwa kateka.²¹ Balimwipwishe, ukwebati, "Kasambilisha, tulishibe ati mulanda no kusambilisha ifya kulungama, kabili tamupatulula uuli onse, lelo musambilisha icishinka pa nshila shakwa Lesa.²² Bushe lifunde fwebo ukupela umusonko kuli Kaisare, nangu iyo?"²³ Lelo Yesu alishibe ubucenjeshi bwabo, kabili alilandile kuli bena ati,²⁴ "Nangeni indalama. Bushe lishina ne cipasho cakwa nani cabapo?" Balilandile ati, "Cakwa Kaisare."²⁵ Alilandile kuli bena ati, "Kanshi peleni kuli Kaisare ifintu fyakwa Kaisare, na kuli Lesa ifintu fyakwa Lesa."²⁶ Balifililwe ukusanga ifilubo pafyo alikulanda pamenso ya bantu, lelo mukusunguka pakwasuka kwakwe, balifye tondolo.²⁷ Ulo bamo aba Saduke baishile kuli ena, abo abalanda ati takwaba ukushukuka,²⁸ balimwipwishe, ukwebati, "Kasambilisha, Mose alitulembele ukwebati umfwa umuntu afwa, uuli no mukashi, kabili uwakubula abana, munyina apyane umukashi, no kufyalilamo munyina abana."²⁹ Kwali bamunyina cinelubli no wakubalilapo alikwete umukashi, kabili alifwile uwakubula umwana,³⁰ no wakulenga bubili cimo cine.³¹ Uwakulenga butatu alimusendele, nao mumusango umo wine nowa cinelubili alifwile kabili tashilemo bana.³² Panuma umwanakashi nao alifwile.³³ Nomba pa kushukuka, akaba mukashi wakwa nani? Pantu abali cinelubili ali mukashi wabo.³⁴ Yesu alilandile kuli bena ati, "Abana ba buno bwikashi ebopa no kupwa."³⁵ Lelo abalingwa abawamino kumono bwikashi bulya kukupokelela ukushukuka kubafwa tabakaleupa nangu ukupwa.³⁶ Kabili tekuti bafwe nakabili, pantu balilingene naba malaika kabili bana bakwa Lesa, pakuba abana ba cishukuko.³⁷ Lelo ukwebati abafwa balabushiwa, na Mose alilangile, pa ncende ya cimpusa, apo akutile Shikulu Lesa wakwa Abrahamu na Lesa wakwa Isaki na Lesa wakwa Yakobo.³⁸ Nomba tali Lesa wa bafwa, lelo waba mweo, pantu bonse ba mweo muli ena."³⁹ Bakalemba bamo balyaswike ati, "Kasambilisha, mulyasukile bwino."⁴⁰ Pantu tabamwipwishopo na yambi amepusho.⁴¹ Yesu alilandile kuli bena ati, "Bushe balanda shani ukwebati, Kristu mwana wakwa Dabidi?"⁴² Pantu Dabidi umwine akolanda mwibuku lya malumbo ati, Shikulu alilandile kuli Shikulu wandi ati, 'Ikala kukuboko kwandi ukwa kukulyo,'⁴³ mpaka nkalenge abalwani bobo icakunyantapo amakasa yobe.⁴⁴ Eco Dabidi akuta Kristu ati 'Shikulu,' nomba kuti aba shani umwana wakwa Dabidi?"⁴⁵ Mukumfwa kwa bantu bonse alilandile ku basambi bakwe ati,⁴⁶ "Cenjeleni na bakalemba, abafwaya ukwenda mumalaya yabo ayatali kabili balitemwa ukubaposha imitende ya bucindami muncende ya fisankano ne fipuna fya bufumu muma synagoge ne fifulo fya bucindami mu mitebeto."⁴⁷ Abalila bamukamfwilwa amayanda, na mukuilangisha balapepa amapepo ayatali. Abantu abakubefi bakapokelela ukusekwa kukalamba."

21

¹Yesu alinwine amenso no kumona bafyuma bakobika ifya bupe fyabo mu cipao.² Alimwene mukamfwilwa umubusu abikamo utunya mpuku tubili.³ Eco alilandile ati, Mucinefye nkomweba nati, uyu mukamfwilwa umubusu apela icakucilapo pali bonse.⁴ Bonse aba bapele ifyabupe pa bwingi bwafyo bakwata. Lelo uyu mukamfwilwa, mu bucushi bwakwe, apele fyonse ifyo ali no kwikalilamo.⁵ Ulo bambi bali kulanda pe tempele, ifyo baliwaminishe na mambwe yabune ne fyaabupe, alilandile ati,⁶ "Palwa ifi fintu mukomona, inshiku shikesa ulo takwakabe ilibwe ilikashala pelibwe linankwe ilishakapone panshi."⁷ Eco bali mwipwishe, ukwebati, "Mwe Kasambilisha, nililali ifi fintu fikacitika? Ngefishibilo fikaba shani ulo ifi fintu fili mukucitika?"⁸ Yesu alyaswike ati, "Cenjeleleni ukwebati tamulufiwe. Pantu abengi bakeshila mwishina lyandi, ukulanda ati, 'Ninebo ena,' kabili, 'Inshita ilipaleme.' Mwikaya kuli bena."⁹ Ulo mukomfwa inkondo ne mpasase, mwikatina, pantu ifi fintu efikabalilapo ukucitika, lelo impela tayakacitike apopenefye."¹⁰ Nolu alilandile kuli bena ati, "Uluko lukemina uluko lunankwe, no bufumu bukemina ubufumu bunankwe."¹¹ Kukaba ne finkukuma ifikalamba, na mucende sha kulekana lekana ifipowe ne fikuko. Kukaba ifyakutinya ne fishibilo ifikalamba ukufuma mumulu.¹² Lelo ulo ifi fintu fyonse tafilacitika, bakamikata no kumipakasa, ukumitwala muma synagoge na mufifungo, ukumitwala kuli bashamfumu na bakateka pa mulandu we shina lyandi.¹³ Fikesa ku mitwala ku nshita ya bunte bwenu.¹⁴ Eco kanshi ipinguleni mu mitima yenu ukukana pekanishisha libela ifya kulubulula,¹⁵ pantu nkamipela ifyebona na mano ayo abalwani benu bakafilwa ukukana nangu ukutalika.¹⁶ Lelo mukafutukwa na bafyashi benu, ba munonko, balupwa, ne fibusa, kabili bakepayapo bamo pali mwebo.¹⁷ Mukapatwa kuli bonse pa mulandu we shina lyandi.¹⁸ Lelo takwakabe nangu umo umushishi wa mu mitwe yenu uukaloba.¹⁹ Mukushipikisha kwenu emo mukanonkela imyeo yenu.²⁰ Ulo mukamona Yerusalemu ilishingulwikwe ne fita, ishibeni ukwebati ukonaulwa kwaiko kuli paleme.²¹ Ninshi lekeni abo abali mu Yudea bafulumukile ku mpili, lekeni abo abali mu musumba bafumemo, na bali mu mapanga beingila mu musumba.²² Pantu ishi ni nshiku sha cilandushi, pakwebati ifintu fyonse ifyalembwa fikafikilishiwe.²³ Akalanda kuli abo bali na mafumo na bakoonsa muli isho inshiku! Pantu kukaba ukumanama ukukalamba pa calo, ne cipyu kuli aba bantu.²⁴ Bakawa ku lupanga, no sendwa bunkole mu nko shonse, na Yerusalemu ikanyantaulwa ku bena Fyalo mpaka inshita ya bena Fyalo ikafikilishiwe.²⁵ Kukaba ifishibilo ku kasuba, ku mweshi, na ku ntanda, na pe sonde. Inko shikaba mu bulanda, mu mwenso pa kubuluma kwa pali bema na mabimbi.²⁶ Kukaba abantu abakalekufwa icitu ku mwenso na kukulolela ifintu ifikoisa kupona pa calo. Pantu amaka ya mu myulu ya kasunkanishiwa.²⁷ Nolu bakamona Umwana wa Muntu akoisa mwikumbi na maka no bukata bukalamba.²⁸ Lelo ulo ifi fintu fyatendeka ukucitika, iminineni kabili mwinune imitwe yenu, pantu ukulubuka kwenu kukopalama."²⁹ Yesu alibelele umulumbe, "Lolesheni umukunyu, ne miti yonse."³⁰ Ulo amabula yapuka, mulaimwena mwebene no kwishiba

ukwebati ulusuba lulipaleme. ³¹Ifyo fine, ulo mwamona ifi fintu fikocitika, ishibeni ukwebati ubufumu bwa kwa Lesa buli mupepi. ³²Mucinefye nkomweba nati, ino nkulo tayakapite mpaka ifi fintu fikacitike. ³³Umulu ne sonde fikapita, lelo ifyebo fyandi tafyakapite. ³⁴Lelo ilameni mwebene, pakwebati imitima yenu tailemenenwe ne micitile ya buweleweke na bu cakolwa elo na masakamika ya bwikashi, na bulya bushiku mukupumikisha ukwisa ³⁵kubati citeyo. Pantu cikesa pali bonse abekala pe sonde lyonse. ³⁶Lelo mube abakulola inshita yonse, ukulapepa ukwebati mube abakukosa ukupusuka kuli ifi fintu fyonse ifikesa kucitika, nokwisa kwiminina pa cinso ca Mwana wa Muntu. ³⁷Eco mu kasuba ali kusambilisha mwi tempele, kabili ubushiku ali kufumamo no kuya kwikala ku lupili lukutwa ulwa Miolife. ³⁸Abantu bonse balikucelela ukuya ku ku mumfwa mwi tempele.

22

¹Nomba Umutebeto wa Mukate Uushatutumuka wali ukopalama, uwitwa ica Kucilila. ²Bashimapepo bakalamba na bakalamba balikufwaya umwakwipaila Yesu, pantu balikutina abantu. ³Nolu Shetani alingile muli Yuda, uo balikwita Iscariote, uwali umo pa bekumi na babili. ⁴Yuda alile kuli bashimapepo bakalamba na bamushika nokulanshanya nabo pafyo enga futuka Yesu kuli bena. ⁵Balisekelele kabili balisumine ukumupela indalama. ⁶Alisumine no kufwaisha akashita enga mupelelamo kuli bena apatali ibumba. ⁷Nolu bwalifikile ubushiku bwa mukate uushitutumuka, ulo ilambo lya cakucilila lyali no kwipaiwamo. ⁸Eco Yesu alitumine Petero na Yohane, ukwebati, "Kabiyeni muye kutupekanishisha icakucilila, ukwebati twise kulya." ⁹Balilandile kuli ena ati, "Nikwi mukofwaya tuye kupekanishisha?" ¹⁰Alibaswike ati, "Lolesheni, ulo mukoya kwingila mu musumba, umwaume uusendele umutondo wa menshi akoya ku mikumanya. Muye kumukonka mung'anda umo akoya kwingila. ¹¹Elo muye kulanda kuli shikulu wa ng'anda ati, 'Kasambilisha alandile kuli mwebo ati, 'Ulupi umuputule wa beni, umo nkolila Icacucilila pamo na basambi bandi?' ¹²Akoya kumilanga umuputule wa pamulu uukalamba ulyanshikwemo bwino. Emo muye kupekanishisha." ¹³Eco balile, nokuya kusanga fyonse filifye filya fine acifilanda. Nolu balipekenye Icacucilila. ¹⁴Ulo akashita kafikile, alikele pamo na batumwa. ¹⁵Nolu alibelele ati, "Nali kufwaisha ukulya umutebeto uyu naimwe apo nshilacula. ¹⁶Pantu nkomweba nati, nshakalyepo nemwe nakabili mpaka cikafikilishiwe mu bufumu bwakwa Lesa." ¹⁷Nolu Yesu alibulile ulukombo, kabili ulo atotele, alilandile ati, "Buleni ici, akaneni pakati keni. ¹⁸Pantu nkomweba nati, Nshakanwepo nakabili ifya fisabo fya mwangashi mpaka ubufumu bwakwa Lesa bukesa." ¹⁹Nolu alibulile umukate, kabili ulo atotela, ali umokawile, no kupela kuli bena, ukwebati, "Uyu emubili wandi, uukopelwa kuli mwebo. Mulekucita ifi pa kunjibukisha." ²⁰Alibulile ulukombo mu musango umo wine panuma ya mulalilo, ukwebati, "Ulu ulukombo ezipangano cipya mumulopa wandi, uukoitikiwa pamulandu wenu." ²¹Lelo kutikisheni. Ukuboko kwa ukomfutuka kuli nandi pamo pe tebulo. ²²Pantu Umwana wa Muntu akoya ukulingana nefyo camulingilwe. Lelo akalanda ku muntu uo akofutukilwako!" ²³Balitendeke ukulanshanya pakati kabo nga ninani uwingacita ifi. ²⁴Nolu palimine fikansa pakati kabo palwa kweba ati ninani walingile ukuba umukalamba. ²⁵Alilandile kuli bena ati, "Ishamfumu sha bena fyalo eba shikulu pali bena, nabo abakwata insambu pali bena bakutwa bakacita wa fya bune. ²⁶Lelo tacifwile kubefyo kuli mwebo. Mucilingile, lekeni umukalamba pali mwebo abe kubati eucepeshe kabili uyo uukotungulula abe ngo ukopyunga. ²⁷Pantu ninani umukalamba, uwikala pe tebulo, nangu uukopyunga? Bushe te uyo uwikala pe tebulo? Lelo nebo ndi pakati kenu nga umo uukopyunga. ²⁸Lelo nimwe mwatwalilila nanebo mufya kweshiwa fyandi. ²⁹Namibika pa bufumu, kubati nifyo Tata ambika pa bufumu, ³⁰pakwebati mukalekulya no kunwa pe tebulo lyandi mu bufumu bwandi, kabili mukekala pafipuna fya bufumu ukupingula imitundu ikumi na ibili iya bena Isreali. ³¹Simone, Simone, ucenjele, Shetani alilombele ati ube uwakwe, ukwebati akulule kubati ni ngano. ³²Lelo ndi kupepeleko, ukwebati icicetekelo cobe cipelela. Panuma nga wa aluluka nakabili, ukakoshe ba munonko." ³³Petero alilandile kuli ena ati, "Mwe Shikulu, nebo ndi ipekenye ukuya nenu ku cifungo na kumfwa." ³⁴Yesu alimwaswike ati, "Nkokweba nati, Petero, ulo mukolwe talalila buno bushiku, ukonkana imiku itatu ati tawanjishiba." ³⁵Nolu Yesu alilandile kuli bena ati, "Ulo namitumine ukwabula icikwama, tumba wafikofwaikwa nangu ni ndyato, bushe mwalibulishepo ifili fyonse?" Balyaswike ati, "Nangu kamo." ³⁶Nolu alilandile kuli bena ati, "Lelo nomba, uyo uukwete icikwama, lekeni asende, na pamo penefye na tumba wafikofwaikwa. Uyo utakwete ulupanga ashitishe ilaya lyakwe no kuya kushita lumu. ³⁷Pantu nkomyeba nati, ifyalembwa pali nebo fifwile ukufikilishiwa, 'Apendelwe pamo naba bupulumushi.' Pantu icalandililwe pali nebo cikofikilishiwa." ³⁸Nolu balilandile ati, "Mwe Shikulu, lolesheni! amapanga aya yabili yali apa." Alibelele ati, "Epela." ³⁹Yesu alile, nga fintu alikucita ilingi, ku Lupili lwa Miolife, na basambi bali mukonkele. ⁴⁰Ulo bafikile, alilandile kuli bena ati, "Pepeni pakwebati mwiwila mwiwilo." ⁴¹Alifumine apo bali aya akatalamukila apali intamfu ya kuposa ilibwe, kabili alifukeme no kupepa, ⁴²ukwebati, "Tata, umfwa mukofwaya, fumeni ulukombo ulu pali nebo. Nomba tabuli bufwayo bwandi, lelo ubwenu ukucitwe." ⁴³Nolu malaika ukufuma ku mulu alimonekele kuli ena, kukumukosha. ⁴⁴Pakuba mukulunguluka, alipepele mu maka, ne libe lyalishile kubati matoni ayakalamba aya mulopa yakoponena panshi. ⁴⁵Ulo aimine mukupapa kwakwe, alishile ku basambi bakwe alibasangile balisendeme pamulandu wa bulanda bwabo. ⁴⁶Kabili alibepwishe ati, "Nindo musendamene? Imeni no kupepa, ukwebati mwiwila mwiwilo." ⁴⁷Ulo acili akolanda, moneni, ibumba lyali monekele, na Yuda, umo uwa mu bekumi na babili, akobatungulula. Alipalamine kuli Yesu mukumotomona, ⁴⁸lelo Yesu alimwebelele ati, "Yuda, ukofutuka Umwana wa Muntu kukutomona?" ⁴⁹Ulo abo abashingulwike Yesu bamwene ifikocitika, balyebelele ati, "Mwe Shikulu bushe tubakome ku lupanga?" ⁵⁰Elo umo uwa pali bena akomene umubomfi wakwa shimapepo mukalamba, no kumuputula ukutwi kwa kukulyo. ⁵¹Yesu alilandile ati, "Epela!" Alikete no kutwi kwake, kabili alimundepe. ⁵²Yesu alilandile kuli bashimapepo bakalamba, kuli bakangalila we tempele, naku bakalamba abamwimine ati, "Bushe mukonjishila kubati ndi kapondo, ne mpanga ne nkoli?" ⁵³Ulo nali kuba nemwe mwi tempele cila

bushiku, tamwanjikete. Lelo aka kashita kenu, na maka ya mfimfi.⁵⁴ Pakumwikata, balimutwele mu ng'anda yakwa shimapepo mukalamba. Lelo Petero alikumukonka akatalamukila.⁵⁵ Panuma yakukunka umulilo mukati ka lubansa no kwikala bonse pamo, Petero alikele pakati kabo.⁵⁶ Umukashana umo umubomfi ali mu mwene ulu aikele mu lubuto lwa mulilo no kumulolekesha kabili alilandile ati, "Uyu mwaume naena ali nankwe."⁵⁷ Lelo Petero alikene, ukwebati, "We mwanakashi, nsh mwishibe."⁵⁸ Ulo papitile fye akashita akanono na umbi nao ali mumwene, no kulanda ati, "Nobe uli umo uwa muli bena." Lelo Petero alilandile ati, "We mwaume, Tenebo."⁵⁹ Panuma ya nsa imo umwaume na umbi ali mupatikishe no kulanda ati, "Mucinefye uyu mwaume naena ali nankwe, pantu mwina Galili."⁶⁰ Lelo Petero alilandile ati, "We mwaume, Nshishibile ifyo ukolandapo." Apopenefye, ulu acili akolanda, mukolwe alililile.⁶¹ Mukupilibuka, Shikulu aliloleshe pali Petero, na Petero alibukishe icebo cakwa Shikulu, ulu amwebele ati, "Apo mukolwe talalila ubwalelo uko nkana imiku itatu."⁶² Petero alifumine panse no kulila sana.⁶³ Nolu abaume abali kulinda Yesu balikumupumya no kumuma.⁶⁴ Bali mufimbile icifimbo no kumwipusha, ukwebati, "Sesema! Ninani wakuma?"⁶⁵ Balilandile ifintu ifingi kuli Yesu, ifya kumupontela.⁶⁶ Ulo bwacele, Abakalamba babantu balilongene capamo, bonse bashimapepo bakalamba na bakalemba. Balimutwele ku cilye⁶⁷ no kulanda ati, "Nga niwe Kristu, tweba." Lelo alilandile kuli bena ati, "Nga namyebe, tamwansumine,⁶⁸ kabili nga na mipusha, tamwanjasuke.⁶⁹ Lelo ukufuma pali nomba, Umwana wa Muntu akulaikala kukuboko kwa kulyo ukwa maka yakwa Lesa."⁷⁰ Bonse balilandile ati, "Ninshi uli Mwana wakwa Lesa?" Yesu alilandile kuli bena ati, "Mulilandile ati Ninebo."⁷¹ Balyebele ati, "Nindo tukofwaila na kambone? Pantu fwebene twayumfwila kukanwa kakwe."

23

¹Ibumba lyabo lyonse lyalimine no kutwala Yesu kuli Pilato. ²Balitendekele ukumushinina, ukwebati, "Twalisangile uyu muntu akolufya uluko lwesu, akokanya ukupela umusonko kuli Kaisare, no kulanda ukwebati umwine ni Kristu, imfumu."³ Pilato alimwipwishe, ukwebati, "Bushe uli Mfumu yaba Yuda?" Yesu alimwaswike ati, "Ulilandile ifyo fine."⁴ Pilato alilandile kuli bashimapepo bakalamba na mabumba ati, "Nshisangilemo mulandu muli uyu muntu."⁵ Lelo bena balikoselepo, ukwebati, "Akofulunganya abantu, ukusambilisha mu Yudea monse, ukutendekela mu Galili ukufikafye na kuli ino ncende."⁶ Eco ulu Pilato aumfwile ifi, alipwishe umfwa uyu muntu ali mwina Galili. ⁷Ulo aishibile ukwebati ali mumaka yakwa Herode, alitumine Yesu kuli Herode, uyo nankwe uwali mu Yelusalemu muli shilya nshiku.⁸ Ulo Herode amwene Yesu, alisansamukile nganshi, pantu alikufwaisha ukumumona pa nshita ntali. Alyumfwile palwa ena alisubile ukumonapo ifishibilo ifyo alikucita. ⁹Herode alipwishe Yesu mu fyebo ifingi, lelo Yesu tamwasukilepo nangu kamo. ¹⁰Bashimapepo bakalamba naba kalemba baliminine, bakomushinina mulukakala.¹¹ Herode pamo na bashilika bakwe balisushishe Yesu kabili balimupunike. Nolu balimufwikile insalu shabucindami no kumubwekeshamo kuli Pilato. ¹²Pantu Herode na Pilato balyalukile bacibusa bulya bwine bushiku, pantu akale bali pa bulwani umo no munankwe. ¹³Nolu Pilato alikutile pamo bashimapepo bakalamba naba kateka ne bumba lya bantu ¹⁴no kulanda kuli bena ati, "Muliletele kuli nebo uyu muntu ngo muntu uokofulunganya abantu, kabili moneni, Nebo, ulu nkomwipusha apo muli, nshikosangamo mulandu muli uyu muntu pali ifyo fintu muko mushinina."¹⁵ Iyo, nangu ni Herode wine, pantu alimubweshe kuli fwebo, kabili moneni, tacitile nangu cimo icakumulingila ukufwa. ¹⁶Nomba nkomukanda no kumukakula."¹⁷ ¹⁸Lelo balibilikishe bonse pamo, ukwebati, "Tatukofwaya uyu muntu, kabili tukakwileniko Baraba!" ¹⁹Baraba ali muntu uwa bikilwe mucifungo pamulandu wa busangushi mu musumba no kwipaya.²⁰ Pilato alishile kulanda nabo nakabili, alikufwaisha ukukakula Yesu. ²¹Lelo balibilikishe, ukwebati, "Mutanikeni, Mutanikeni."²² Alilandile kuli bena umuku wa citatu ati, "Nindo, bubi nshi ubo uyu muntu acitile? Nshikosangamo mulandu muli ena uwakumulingila ukufwa. Eco kanshi na panuma ya kumukanda, nkomukakula."²³ Lelo balikoselepofye na mashiwi ayakalamba, balikufwaya ukwebati atanikwe. Amashiwi yabo yali nashishe Pilato. ²⁴Eco Pilato alisalilepo ukubapela ifyo balikufwaisha. ²⁵Akakwile uo balikulomba uwakakilwe mu cifungo pamulandu wa bucisanguka no kwipaya. Lelo alibapele Yesu ku kufwaya kwabo. ²⁶Ulo balikuya bakomutungulula, baliketepo umo Simone waku Kurene, uwali kufuma mu mpanga, kabili balimutwikile icapindama ukusenda, akukonka Yesu. ²⁷Ibumba likalamba ilya bantu, na banamayo abalikullosha no kumulilila, balikumukonka ²⁸Lelo pakupilibukila kuli bena, Yesu alilandile kuli bena ati, "Mwe bana banakashi ba mu Yerusalemu, mwilandilila, lelo mulekuililila mwebene na bana benu."²⁹ Pantu moneni, inshiku shikoisa isho bakalanda ati, 'Shalipalwa ing'umba, na mafumo ayashafyele, na mabele ayasha onseshe.'³⁰ Nolu bakatendeka ukulanda ku mpili ati, 'Wileni pali fwebo,' na kutupili ati, 'Tufimbeni.'³¹ Pantu nga bakocita ifi fintu ulu icimuti cicili icibishi, nindo ikacitika ulu cikoma?"³² Bambi abaume, utupondo tubili, twali tungulwilwe nakwe ukuya ku kwipaiwa.³³ Ulo bafikile ku ncende iikutwa 'Icipanga,' palya epo bamutanikile no tupondo - kamo ku kuboko kwa kukulyo na kanankwe kukwa ku kuso. ³⁴Yesu alilandile ati, "Tata, beleleni, pantu tabeshibile ifyo bakocita." Nolu balipendwile, pa kwakana insalu shakwe. ³⁵Abantu baliminine bakotamba ulu bakateka nabo bali bakomupumya, ukwebati, "Alikupususha bambi. Naipusushe umwine, nga ni Kristu wakwa Lesa, uwasalwa."³⁶ Abashilika nabo balimupumishe, bakomupalama, bakomupela mwangashi uwakantuka, ³⁷no kwebati, "Umfwa uli Mfumu ya ba Yuda, ipusushe we mwine."³⁸ Kwaliko ne cishibilo pali ena ati, "Uyu ni Mfumu yaba Yuda."³⁹ Kamo pa tupondo utwatanikwe palya kali mutukile mukulanda ati, "Bushe twebho Kristu? Ipusushe we mwine na fwebo."⁴⁰ Lelo kambi kalimukalipile, ukwebati, "Bushe taukotina Lesa, apo webo uli mubupingushi bumbo bwine ubwa kukandwa?" ⁴¹Pantu fwebo cilitulingile ukuba pano, pantu tukopokelela icitulingene ne micitile yesu. Lelo uyu muntu tacitile icibi nangu cimo."⁴² Nolu alilandile ati, "Mwe Yesu, mukanjibukishe ulu mukesha mu bufumu bwenu."⁴³ Yesu alilandile kuli ena ati, "Mucinefye nkokweba nati, ubwelelo ukoba nanebo mu

paradise."⁴⁴Nomba cali mupepi ne nsa iya kulenga mutanda, ne mfimfi yalishile pesonde ponse ukufika ku nsa ya kulenga pabula⁴⁵ulo akasuba kafimbilwe ne mfimfi. Nolu icisalu ca mwi tempele calyakanike pabili.⁴⁶Pakubilikisha ne shiwi ilikalamba, Yesu alilandile ati, "Mwe Tata, mu maboko yenu emo nabika umupashi wandi." Ulo alandile ifi, alifwile.⁴⁷Ulo umukalamba wa bashilika amwene icacitike, alilumbenye Lesa, ukulanda ati, "Mucinefye uyu muntu ali mulungami."⁴⁸Ulo amabumba yonse ayalongene pamo pali iyi ncende bamwene ifintu fyalu kucitika, bali bwelelemo bakokunkunsha pa fifuba fyabo.⁴⁹Lelo abo bonse abamwishibile, na banamayo abali kumukonka ukufuma ku Galili, baliminine akatalamukila, bakotamba ifi fintu.⁵⁰Moneni, kwaliko umwaume uwalikwitwa Yosefe, uwali umo pa bamucilye. Ali wabune kabili umuntu umulungami.⁵¹Uyu muntu talikusuminishako kumapange yabo nefyo balikucita. Afumine ku Arimatea, umusumba waba Yuda, kabili alikufwaya ubufumu bwakwa Lesa.⁵²Uyu muntu, pakukumamya Pilato, alilombe umubili wakwa Yesu.⁵³Aliwikishe panshi kabili ali upombe mu nsalu sha kolokondwe, no kuubika munshishi iyaimbilwe mwilibwe, umushashikilwepo umuntu nangu umo.⁵⁴Bwali Bushiku bwa Kuteyanya, ne Sabata lyali mupepi no kutendeka.⁵⁵Banamayo abaishile na Yesu ukufuma ku Galili balikonkeleko Kabili balimwene nshishi nefyo umubili wakwe walalikwe.⁵⁶Balibwelelemo kukupekanya ifyacena cabune na mafuta. Elo pe Sabata balitushishe ukulingana ne fyaba imfunde.

24

¹Ku macaca pa bushiku bwa kubalilapo ubwa mulungu, balishile ku nshishi, ukuletako ifya cena cabune ifyo bapekenye.
²Basangile ilibwe lilikunkulukilepo pa nshishi.³Balingilemo, lelo tabasangilemo umubili wakwa Shikulu Yesu.⁴Calicitike ukwebati, ulo bali balifulungene pali ici, mukukana ibukila, abaume babili balimimine mupepi na bena mu nsalu shakubengeshima.⁵Ulo abanakashi bali bakosunguka no kukontamika ifinso fyabo ukulolesha panshi, balilandile ku banakashi ati, "Nindo mukofwaila uwa mweo ku bafwa?"⁶Tali muno, lelo alibushiwe! Ibukisheni ifyo alandile kuli mwebo ulo ali ku Galili,⁷ukwebati Umwana wa Muntu afwile ukupelwa mu maboko ya bantu ababembu no kutanikwa, kabili pa bushiku bwakulenga shitatu akabuka nakabili.⁸Abanakashi balibukishe amashiwi yakwe⁹kabili balibwelelemo ukufuma ku nshishi no kulondolola ifintu fyonse kubekumi na umo na kuli bonse abashelepo.¹⁰Nomba Maria umwina Magadala, Yoana, Maria nyina wakwa Yakobo, na bambi abanakashi abali na bena balifishishe fyonse ifi ku batumwa.¹¹Nomba aka kasebo kamoneke kubati cilandelandefye ku batumwa, kabili tabasumine bana mayo.¹²Lelo Petero alimine no kubutuka ukuya ku nshishi, kabili, alinaminemo no kuloleshamo, alimwene insalu shakolokondwe shilifye sheka. Petero nolu alile kwakwe, akopapa ifyacitike.¹³Moneni, babili bali bakoya bulya bwine bushiku ku mushi uwitwa Emmausi, uko ukwali intamfu amakumi mutanda ukufuma ku Yerusalemu.¹⁴Balikulashanya cila umo no munankwe palwa fintu fyonse ifyacitike.¹⁵Calicitike ukwebati, ulo bali bakolanshanya no kwipushanyana capamo, Yesu umwine alibakumenye no kuya nabo.¹⁶Lelo amenso yabo tayasuminishiwe ukwebati ba mwishibe.¹⁷Yesu alilandile kuli bena ati, "Milandu nshi mukolanshanyapo ulo mukoenda?" Baliminine palya bakomoneka ababulanda.¹⁸Umo pali bena, ishina lya kwe ni Kleopasi, ali mwaswike ati, "Bushe niwe weka mu Yerusalemu uteshibile ifintu ificitike kulya shino nshiku?"¹⁹Yesu alilandile kuli bena ati, "Fintu nshi?" Balimwaswike ati, "Ifintu ifikumine Yesu umwina Nasarete, uwali kasesema, uwa maka ku ficitwa na ku cebo ku cinsu cakwa Lesa na ku bantu bonse,²⁰Kabili nefyo bashimapepo mukalamba na bakateka besu balimupele ku kupingwilwa imfwa no kumutanika.²¹Lelo fwebo twalesubila ukwebati ni ena uwali no kulubula Isreali. Ee, kabili icacilapo cinshi, nomba buno bushiku bwakulenga shitatu apo ifi fintu fya citikile.²²Lelo kabili, bamo bana mayo abali na fwebo balitupapwishe, pakusangwa bali ku nshishi kumacaca.²³Ulo bashasangile umubili wakwe, balishile, ukulanda ukwebati balimwene icimonwa caba malaika abalikunda ukwebati ali uwa mweo.²⁴Abaume bamo abali na fwebo balile ku nshishi, no kuya kusanga fye nga filya fine banamayo bacilanda. Lelo tabacimumona umwine."²⁵Yesu alilandile kuli bena ati, "Mwe fiwelewele fya baume mwe bakokola ukusumina mu imitima fyonse ifyo bakasesema balanda!"²⁶Bushe tacali icikankala Kristu ukucula kuli ifi fintu, no kwingila mu bukata bwakwe?"²⁷Nolu ukutendekela kuli Mose na muli bakasesema bonse, Yesu alibelwilile ifintu ifikumine umwine mu malembo yonse.²⁸Ulo bapalamine ku mushi uko balikuya, Yesu acitile kubati akopitilila ukucilapo.²⁹Lelo bali mupatikishe, ukwebati, "Ikala na fwebo, pantu cungulo na kasuba kaliwile." Eco Yesu alile kwikala nabo.³⁰Calicitike ukwebati, ulo aikala nabo ku kulya, alibulile umukate, aliupalile, no kuumokaula, aliupele kuli bena.³¹Nolu amenso yabo yalisukile, no kumwishiba, kabili alilubile mu menso yabo.³²Balilandile kuli umo no munankwe ati, "Bushe imitima yesu tayacila bilimuka munda sheshu, ulo acilalanda kuli fwebo mu nshila, ulo acisula amalembo kuli fwebo?"³³Balimine kalya kene akashita no kubwelela ku Yerusalemu. Kabili balisangile abekumi na umo na bakolongana pamo na bambi abo bali nabo,³⁴ukwebati, "Shikulu alibukile mucinefye, kabili acimonekela kuli Simone."³⁵Eco balilandile ifintu ifya citike mu nshila, nefyo Yesu aishibikwe kuli bena mu kumokaula umukate.³⁶Ulo balikulanda ifi fintu, Yesu umwine aliminine pakati kabo, no kulanda kuli bena ati, umutende ube na mwebo."³⁷Lelo balitinine no kwisushiwamo no mwensu no kutontonkanya ukwebati bakomona iciwa.³⁸Yesu alilandile kuli bena ati, Nindo mwatinina? Nindo amepusho yafulila mu mitima yenu?"³⁹Moneni indupi shandi na makasa yandi, ukwebati ninebo. Njikateni no kumona. Pantu umupashi tawakwata munofu na mafupa, nga fintu mukombona nebo nkwe."⁴⁰Ulo alandile ifi, alibalangile indupi shakwe na makasa yakwe.⁴¹Nalo lwine tabacisumine pamulandu wa nsansa, kabili balisungwiwe. Yesu alilandile kuli bena ati, "Bushe mulikwetepo icakulya icili conse?"⁴²Bali mupele aka pimfya ke sabi lyaipikwa,⁴³nao alibulile no kulya pa menso yabo.⁴⁴Alilandile kuli bena ati, "Aya emashiwi yandi ayo nalandile ulo nali na mwebo, ukwebati fyonse ifya lembelwe mu malango yakwa Mose na bakasesema na musha malumbo fifwile ukufikilishiwa."⁴⁵Nolu aliswile amatontonkanyo yabo, ukwebati beshibe

amalembo. ⁴⁶Alilandile kuli bena ati, "Calilembwa, ukwebati Kristu afwile ukucula no ukubuka nakabili ku bakufwa pa bushiku bwakulenga shitatu. ⁴⁷Ukulapila no kwelelwa kwa membu kufwile ukushimikilwa mwishina lyakwe ku nko shonse, ukutendekela ku Yerusalemu. ⁴⁸Mwebo muli bakambone ba ifi fintu. ⁴⁹Moneni, nebo nkomitumina ifyo Tata alaile. Lelo mukekale mu musumba mpakafye ulu mukesushiwamo na maka ukufuma mu mulu." ⁵⁰Nolu Yesu alibatungulwile kunse ukufikafye nelyo bapalamine ku Betani. Alimishe amaboko yakwe no kubapala. ⁵¹Fyalicitike ukwebati, ulu ali akobapala, alibashile kabili alisendelwe mu mulu. ⁵²Eco bali mushinshimwine no kubwelelamo ku Yerusalemu ne nsansa ishing. ⁵³Bali konkenyepo ukusangwa mwi tempele, bakolumbanya Lesa.